

Joao Baptista

¹Liafuan diak kona ba Jesus Kristu, Maromak nia Oan Mane, hahu nune'e: ²Hakerek tiha iha livru profeta Isaia nian: "Ha'u haruka Ha'u manu ain ba uluk O, atu hadia dalan ba O." ³Lia ida nebe hakilar iha rai fuik maran, 'Hadia Na'i nia dalan, halos Nia dalan terik.'" ⁴Nune'e mak Joao Baptista mosu iha rai fuik maran, hodi haklaken baptisnu ida penitensia nian atu kasu sala. ⁵Ema rai Judeia tomak, ema Jerusalem hotu ba hasouru nia, no wainhira sira simu baptisnu housi nia iha mota Jordao, sira konfesa sira sala. ⁶Joao hatais kuda kamelu nia fulun, no han lalaek no baniben. ⁷Nia hanorin hodi dehan, "Tuir Ha'u sei to'o mai ida nebe maka'as liu ha'u. Ha'u la soi atu hakru'uk hodi kore Nia sandalis tali. ⁸Ha'u sarani imi ho be, maibe Nia sei sarani imi ho Espiritu Santu."

Jesus nia baptisnu. Diabu babeur Nia

⁹Iha loron hirak ne'e duni mak Jesus mai housi Nazare Galileia nian, hodi simu baptisnu housi Joao iha Jordao. ¹⁰Wainhira Nia sai housi be, ema hare kedas lalehan nakloke; no Espiritu, hanesan manu falur ida, tun ba Nia leten. ¹¹Housi lalehan rona lia ida: "O Ha'u nia Oan doben tebes. Ha'u domin tomak tau iha O." ¹²Ne'e hotu tiha Espiritu Santu lori kedas Jesus ba rai fuik maran. ¹³Nia hela iha neba loron haat nulu. Satanas babeur Nia. Nia hela ho balada fuik sira, no anju sira serbi Nia.

Jesus bolu ema kail ikan na'in sira

¹⁴Wainhira ema dadur ona Joao, Jesus ba Galileia hodi hanorin Maromak nia liafuan diak. ¹⁵"Tempu to'o ona," Nia dehan, "Maromak nia reinu besik ona. Hakribi imi nia sala hodi fiar liafoun diak." ¹⁶Liu housi tasi ibun Galileia nian, Nia hare Simao ho nia alin Andre soe sira nia dai ba tasi, basa sira kail ikan na'in. ¹⁷Jesus dehan ba sira, "Imi tuir Ha'u mai; Ha'u sei halo imi kail na'in ema nian." ¹⁸Sira husik kedas dai hodi tuir Nia. ¹⁹Liu tan uitoan ba oin, Nia hare Tiago, Zebedeu nia oan, ho nia alin Joao iha sira nia ro laran, hadia hela dai. ²⁰Nia bolu sira kedas. Sira husik sira nia aman Zebedeu iha ro laran ho nia emar sira hodi tuir Jesus.

Ema ida ho espiritu foer

²¹Sira ba to'o Kafarnaum. Wainhira loron Sabadu to'o, Nia ba sinagoga hodi hahu hanorin. ²²Ema hotu hakfodak ho Nia hanorin, basa nia hanorin hanesan ema nebe iha kbiit, la'os hanesan eskriba sira. ²³Lo-los iha tempu neba iha sinagoga, mane ida ho diabu iha nia laran mosu. Nia dehan ho lia maka'as, ²⁴"O hakarak sa ida housi ami, Jesus Nazare? O mai atu halakon ami? Ami hatene O se los: O Maromak nia santu!" ²⁵Maibe Jesus lia tun ba nia hodi si'ak: "Nonok! sai housi nia!" ²⁶Diabu doko maka'as ema ne'e hodi hakilar, hafoin sai housi nia. ²⁷Ema hotu hakfodak teb-tebes. Nune'e, sira hahu husu malu buat hirak ne'e katak sa. "Ne'e hanorin foun ida," sira dehan, "no ho kbiit tan! Nia haruka diabu sira, sira halo tuir." ²⁸Nia naran sai boot lalais kedas iha fatin hotu iha Galileia tomak.

Jesus fo isin diak ba ema barak

²⁹Wainhira Jesus sai housi sinagoga, Nia hamutuk ho Tiago no Joao, ba los Simao no Andre nia uma. ³⁰Simao nia banin feto moras isin manas, toba hela. Sira fo hatene kedas ba Jesus kona ba nia. ³¹Jesus hakbesik nia, kaer nia liman hodi tulun nia atu hamriik. Isin manas lakon kedas no nia hahu fo han sira. ³²Iha loraik, loron monu tiha, ema hahu lori ba Nia ema moras sira no sira nebe iha diabu iha laran. ³³Ema hotu sidade nian mai halibur an hamutuk iha odamatan. ³⁴Nia fo isin diak ba ema barak nebe terus moras oi-oin, hodi duni sai diabu barak. Maibe Nia la husik diabu sira koalia, basa sira hatene Nia se.

Jesus hanorin iha Galileia

³⁵Dadersan nakukun, Nia hamriik, sai ba fatin fuik ida hodi harohan. ³⁶Simao ho nia maluk sira buka tuir Nia. ³⁷Hetan tiha Nia, sira dehan, "Ema hotu buka ita." ³⁸Maibe Nia hatan ba sira, "Ita ba knua sira iha sorin balun ba atu Ha'u hanorin mos iha neba, basa tan ne'e mak Ha'u mai." ³⁹Nia hanorin iha sinagoga sira Galileia tomak nian hodi duni sai diabu sira.

Jesus fo isin diak ba ema moras lepra ida

⁴⁰Ema moras lepra ida mai buka Nia, hakneak iha rai hodi husu Nia, "Ita hakarak karik, Ita bele fo isin diak mai Ha'u." ⁴¹Jesus hanoin nia, lolo nia liman hodi kaer nia dehan, "Ha'u hakarak; hetan isin diak ba!" ⁴²Iha oras ne'e kedas, lepra lakon. Nia diak ona. ⁴³Jesus haruka nia ba, hodi dehan ho oin maka'as, ⁴⁴"Keta fo hatene ba ema ida, maibe la'o ba, hatudu o nia an ba am'lulik hodi hasa'e buat nebe Moises haruka atu fo hatene katak o hetan ona isin diak." ⁴⁵Maibe ema ne'e sai hodi fo hatene kedas buat ne'e iha fatin hotu; nune'e Jesus la bele hatudu Nia An iha sidade sira. Nia la'o deit iha liur, iha rai fuik. Maibe housi fatin hotu ema mai buka Nia.

Jesus fo isin diak ba ema isin mate ida

¹Liu loron ruma, Jesus fila fali housi Kafarnaum. Ema rona katak Nia iha uma ona. ²Ema barak tebes halibur hamutuk, atu nune'e sai resin iha odamatan. Nia haklaken liafuan diak ba sira. ³Sira hakarak hatudu ba Nia ema moras isin mate ida nebe ema na'in hat mak lori. ⁴Tan ema barak iha neba, sira la bele lori ba to'o Nia. Tan ne'e sira loke uma nia kakuluk iha los fatin nebe Nia hela nia leten. Halo tiha kuak ida, sira hatun ema ne'e iha nia toba fatin. ⁵Tan hare ema sira nia fiar, Jesus dehan ba ema moras ne'e, "Ha'u oan, o nia sala sira hetan ona perdua." ⁶Eskriba balun tur iha neba. Sira hanoin iha sira nia laran. ⁷"Tan sa Nia koalia hanesan ne'e? Nia hateten aat Maromak! Ema se mak bele perdua sala? Maromak deit mak bele!" ⁸Maibe Jesus hatene ona buat nebe sira nia hanoin iha sira nia laran, tan ne'e Nia husu ba sira, "Tan sa imi hanoin hanesan ne'e iha imi nia laran? ⁹Ida nebe mak lalais liu, dehan ba ema moras ne'e, 'O simu ona perdua ba o nia sala,' eh dehan 'O hamriik, kaer o nia hadak no la'o ba?' ¹⁰Diak, atu imi hatene katak Oan Mane iha kbiit iha rai ne'e atu fo perdua ba sala, ¹¹'Ha'u haruka o,' Nia dehan ba moras isin mate, 'Hamriik ba, foti o nia hadak no la'o ba uma.'" ¹²Ema ne'e hamriik, foti kedas nia hadak hodi la'o iha ema hotu nia oin. Ema hotu hakfodak hodi hahi Maromak dehan, "Ami la dauk hare buat ida hanesan ne'e."

Jesus bolu Levi

¹³Jesus sai fali ba tasi ibun. Ema barak ba hasouru nia. Nia hanoin sira. ¹⁴Tuir dalan, Nia hare Levi, Alfeu nia oan, tur iha nia fatin hodi kobra osan. Jesus dehan ba nia, "Mai, tuir Ha'u." Nia hamriik hodi tuir Jesus. ¹⁵Wainhira Jesus han iha nia uma, publikanu balun no ema maksalak sira tur hamutuk ho Jesus ho nia

eskolante sira, basa barak housi sira leet tuir Nia.¹⁶ Eskriba sira housi fariseu sira nia sorin hare katak Nia han hamutuk ho ema maksalak ho publikanu sira. Sira dehan ba Nia eskolante sira, “Tansa Nia han hamutuk ho publikanu no ema maksalak sira?”¹⁷ Jesus, rona hotu ne'e, hatan ba sira, “La'os ema isin diak mak presisa doutor, maibe sira nebe moras. Ha'u la mai atu bolu ema diak, maibe ema maksalak sira.”

Kona ba hadera an

¹⁸Loron ida, wainhira Joao nia eskolante sira no fariseu sira halo dau-daun hadera an, sira mai dehan ba Jesus, “Tansa Joao no fariseu sira nia eskolante hadera an, O nia eskolante fali lae?”¹⁹ Jesus hatan ba sira, “Noivu nia belun sira bele hadera an wainhira noivu sei hela hamutuk ho sira? Wainhira nia sei hela hamutuk ho sira, sira la bele hadera an.”²⁰ Maibe loron sei to'o mai wainhira ema sei hasai tiha noivu housi sira. Iha loron ne'e mak sira sei hadera an.”²¹ “Ema ida la taka kuak iha hena tuan ho hena foun. Nia halo karik, hena foun sei hales hena tuan, no kuak sei sai boot liu.”²² Ema ida la fui tua foun iha fatin tuan. Nia halo karik, tua sei halo kulit nakles no tua sei nakfakar. Ema tau tua foun iha fatin foun.”

Kona ba Sabadu

²³Loron Sabadu ida, Jesus, la'o iha to'os batar nian nia laran. Tuir dalan, Nia eskolante sira han batar musan.²⁴ Fariseu sira dehan ba Nia: “Hare ba, tansa sira halo buat nebe la bele halo iha loron Sabadu?”²⁵ Nia hatan, “Imi la lee buat nebe David halo wainhira nia iha susar laran no hamlaha: nia ho nia emar sira?”²⁶ Oin sa nia tama iha Maromak nia uma, iha tempu am'lulik boot Abiatar nian, hodi han paun nebe hasa'e tiha ona ba Maromak, paun nebe am'lulik sira deit mak bele han? No mos nia fo paun ne'e ba sira nebe hela ho nia?”²⁷ Nia dehan tan ba sira, “Maromak halo Sabadu ba ema nia diak, la'os ema ba Sabadu nian: ²⁸tan ne'e, Oan Mane mak loron Sabadu mos nia Na'in.”

3

Ema ho liman aat

¹Jesus ba fali sinagoga ida. Iha neba iha ema nebe liman aat.² Sira hateke ba Nia atu hare keta Nia fo isin diak ba nia iha loron Sabadu, hodi hein atu foti lia ruma hasouru Nia.³ Nia dehan ba ema ho liman aat: “Hamriik iha klanan mai!”⁴ Tuir mai, Nia husu sira: “Tuir ukunfuan, ida nebe mak bele halo iha loron Sabadu, halo diak eh halo aat: soi ema nia moris eh halo aat nia?” Maibe sira nonok deit.⁵ Laran nakali tebes tamba Nia hetan katak sira laran tos, Nia hateke ba ema hotu nebe hale'u Nia, hodi dehan ba ema ne'e, “Lolo o nia liman.” Nia lolo nia liman, no nia liman diak kedas.⁶ Fariseu sira sai ba liur no hahu kedas atu la'o hamutuk ho Herodes nia emar sira hodi buka oin sa sira bele halo aat Nia.

Jesus iha tasi ibun

⁷Jesus la'o ba tasi ibun Galileia nian ho Nia eskolante sira. Ema lubun boot housi Galileia la'o tuir Nia.⁸ Housi Judeia, housi Jerusalem, housi Jordao nia sorin no housi rai Tiro no Sidon nia sorin sorin, ema lubun boot nebe rona kona ba buat hotu nebe Nia halo mai buka nia.⁹ Nia haruka nia eskolante sira atu hadia ro ida ba Nia atu ema lubun boot ne'e la bele hanehan Nia,¹⁰ basa Nia fo isin diak ba ema barak, no sira hotu nebe moras buka atu hakbesik no kona Nia.¹¹ Espiritu foer sira nebe hare Nia, monu iha Nia ain hodi hakilar ho lia maka'as, “Ita Maromak nia Oan!”¹² Maibe Jesus bandu sira ho oin tos atu la bele fo hatene Nia se.

Jesus fihir nia emar sanulu resin rua

¹³Jesus sa'e ba foho no bolu sira nebe Nia hakarak. Atu la'o ho Nia.¹⁴ Nia fihir ema na'in sanulu resin rua atu la'o hamutuk ho Nia no haruka sira atu hanorin¹⁵ hodi fo kbiit ba sira atu duni sai diabu sira.¹⁶ Nia hili sira sanulu resin rua ne'e: Simao, nebe Nia hanaran Pedro:¹⁷ Tiago, Zebedeu nia oan, no Joao, Tiago nia alin. Sira ne'e Nia hanaran Boanerges, katak rai tarutu nia oan:¹⁸ Andre, Filipe, Bartolomeu, Mateus, Tome, Tiago, Alfeu nia oan, Simao Zeloso¹⁹ no Judas Iscariotes, nebe sei saran Nia.

Jesus no diabu sira nia na'i ulun

²⁰Jesus fila fali ba uma, no dala ida tan, ema lubun boot buka Nia. Tan ne'e Nia la bele han.²¹ Wainhira Nia parenti sira rona kona ba ida ne'e, sira sai atu kaer Nia, basa sira dehan katak Nia bulak ona.²² Eskriba sira nebe mai housi Jerusalem dehan, “Nia iha diabu,” no “Nia duni sai diabu sira hodi diabu sira nia Na'i ulun nia naran.”²³ Ne'e duni Jesus bolu sira hodi haktuir aiknanoik ida ba sira dehan, “Oin sa mak diabu bele duni sai diabu?”²⁴ Reinu ida la tuir malu karik, reinu ne'e la bele tahan.²⁵ Uma-kain ida la iha unidade karik, uma-kain ne'e la bele hela kleur;²⁶ nune'e mos Satanas hamriik hasouru nia an karik, nia fahe malu ona; nia la bele tahan; nia rohan to'o ona²⁷ Ema ida la bele tama iha ema maka'as nia uma hodi na'ok nia rikuso molok nia, uluk knanain, kaer ema maka'as ne'e. Foin mak nia bele na'ok rikuso sira.”

²⁸“Tebe Ha'u ba imi: ema sira nia sala no sira nia lia aat hasouru Maromak sei hetan perdu, maibe ema nebe hateten aat Espiritu Santu sei la hetan perdu. Nia halo sala rohan laek nian.”²⁹ Ne'e tamba sira dehan, “Nia iha diabu.”

Jesus Nia inan no maun alin

³¹Nia inan no maun alin sira to'o iha neba. Sira hamriik iha liur hodi hameno lia atu fo hatene ba Nia.³² Iha tempu nebe lia hirak ne'e to'o ba Nia, “O nia inan no maun alin sira hela iha liur hodi buka O,” ema lubun boot tur hale'u Nia.³³ Nia hatan: “Se mak Ha'u nia inan no maun alin sira?”³⁴ Hodi hateke ba sira nebe hale'u Nia, Nia dehan, “Sira ne'e mak Ha'u nia inan no maun alin sira.”³⁵ Ema nebe halo tuir Maromak nia hakarak, ema ne'e mak Ha'u nia maun alin, bin feton no inan.”

4

Aiknanoik kona ba fini

¹Nia hahu hanorin fali iha tasi ibun. Ema lubun boot mai atu rona nia. Tan ne'e Nia tur iha ro ida iha tasi laran. Ema sira hela iha tasi ibun, iha rai maran.² Nia hanorin sira buat barak ho aiknanoik. Nia hanorin dehan³ “Rona di-diak ba. Ema ida ba kari fini.⁴ Nia kari fini dau-daun, fini balun monu iha dalan. Manu sira mai hodi han sira hotu.⁵ Balun monu iha fatuk leten. Iha neba rai utoan deit. Fini sira ne'e moris lalais, basa rai la klean,⁶ maibe wainhira loron sa'e hamanas sira, sira namlaek, basa sira abut la iha.⁷ Fini balun monu iha ai-tarak laran. Ai-tarak moris maka'as hodi hanehan sira. Fini sira ne'e la fo fuan ida.⁸ Fini balun monu iha rai diak, hodi moris buras no fo fulin maka'as, balun dala tolu nulu, balun neen nulu, no balun dala atus ida.”⁹ Nia dehan tan, “Ema nebe iha tilun, rona ba!”

¹⁰Wainhira Nia mesa-mesak ona, sira sanulu resin rua no mos sira seluk nebe tuir Nia husu aiknanoik ne'e katak sa. ¹¹Nia hatan ba sira: "Misteriu Maromak nia reinu nian fo sai tiha ona ba imi, maibe ba sira nebe hela iha liur buat hotu mai deit housi aiknanoik sira, ¹²atu sira hare fila fila maibe la hare mos; sira rona fila fila maibe la hatene los, keta sira fila ba diak karik no hetan perdua.

Jesus fo hatene sai aiknanoik fini nian katak sa

¹³Hafoin Nia dehan ba sira, "Imi komprende aiknanoik ida ne'e? Oin sa imi bele komprende aiknanoik sira seluk? ¹⁴Fini nebe ema kari mak liafuan. ¹⁵Sira nebe monu iha dalan mak ema sira nebe, rona tiha liafuan, Satanas mai kedas hodi hasai housi sira liafuan nebe foin kari. ¹⁶Nune'e mos, sira nebe simu fini iha fatuk leten mak sira nebe, wainhira sira foin rona liafuan, simu nia ho ksolok, ¹⁷maibe sira nia abut la iha. Sira la tahan. Susar ruma mosu karik, eh terus ruma tamba liafuan mai hasouru karik, sira monu lalais. ¹⁸Hafoin sira seluk nebe simu fini iha ai-tarak laran, sira ne'e rona tiha liafuan, ¹⁹maibe hanoin mundu ne'e nian no mos babeur housi rikusoi no babeur sira seluk hanehan liafuan ne'e. Nune'e nia la fo fuan ida. ²⁰Sira nebe simu liafuan iha rai diak, sira rona liafuan hodi simu nia no fo fuan barak; balun dala tolu nulu, balun dala neen nulu eh dala atus ida."

Lilin iha balde okos

²¹Jesus dehan tan ba sira, "Imi sunu lakan lilin ida hodi tau nia iha balde okos eh iha tobafatin okos? Lo-los, imi sei tau nia iha lilin fatin! ²²La iha buat ida nebe bele subar nebe ema sei la fo sai; la iha buat ida nebe haksumik nebe ema sei la fo hatene. ²³Ema nebe iha tilun atu rona, rona ida ne'e ba."

²⁴Nia dehan mos ba sira, "Rona di-diak buat nebe imi rona dau-daun. Sasukat nebe imi usa sei usa mos ba imi, no barak liu tan, ²⁵basa ba ema nebe iha ona sei fo tan; housi ema nebe la iha, buat nebe nia iha sei hasai tan housi nia."

Aiknanoik musan nia

²⁶Nia dehan mos, "Maromak nia reinu hanesan ne'e: Ema ida kuda musan ida iha rai. ²⁷Kalan loron, nia toba ka hader, musan ne'e moris no sai boot; oin sa los, nia la hatene. ²⁸Housi nia kbiit rasik, rai fo uluk dikin, hafoin fulin, no ikus mai trigu nebe tasak ona. ²⁹Wainhira trigu tasak ona, ema ne'e kaer tudik, basa tempu atu ko'a trigu to'o ona mai."

Aiknanoik mustarda musan nian

³⁰Jesus dehan tan; "Ita sei usa ilas ida nebe atu hatudu Maromak nia reinu? Ho aiknanoik ida nebe mak ita sei hatudu nia? ³¹Nia hanesan mustarda musan ida nebe wainhira ema kari iha rai mak kiik liu musan sira hotu iha raiklaran, ³²maibe kuda tiha, nia moris no sai boot liu hodi hatubun sanak bo-boot atu nune'e manu sira iha lalehan bele subar an iha nia mahon."

³³Ho aiknanoik barak hanesan ne'e, Nia haklaken ba sira tuir buat nebe sira bele komprende. ³⁴Ba sira, Nia koaliala ho aiknanoik deit, maibe ba eskolante sira, wainhira sira mesa-mesak deit, Nia fo hatene mo-mos buat hotu.

Jesus halo tasi hakmatek

³⁵Iha loron ne'e rasik, wainhira loraik ona, Nia dehan ba sira, "Ita hakur tiha ba tasi sorin balun ba." ³⁶Sira husik ema lubun boot hodi lori deit Nia iha ro laran. Ro seluk mos ba hamutuk ho Nia. ³⁷Tuir mai, anin hahu sai boot. Laloran baku maka'as ro, halo be tama iha ro laran, besik atu nakonu. ³⁸Jesus iha ro ikun, toba hela ho Nia ulun iha somasu leten. ³⁹Sira fanu Nia hodi dehan, "Mestre, Ita la hare katak ita atu mate ona?" Nia hamriik. Ho lia maka'as, Nia koaliala ba anin no dehan ba tasi, "Nonok! Hakmatek ba!" Anin nonok kedas; buat tomak hakmatek. ⁴⁰Hafoin Nia lia tun ba sira, "Tan sa imi tauk hanesan ne'e? Nusa imi fiar laek?" ⁴¹Sira tauk teb-tebes hodi dehan ba malu, "Ema ne'e se los? Anin no tasi mos halo tuir Nia!"

Jesus fo isin diak ba ema nebe iha espiritu foer

¹Sira to'o rai Gerasa iha tasi nia sorin balun. ²Wainhira Nia tun housi ro, ema ida ho espiritu foer sai housi rate sira leet ba hasouru Nia. ³Ema ne'e horik iha rate sira laran. La iha ema nebe bele tahan nia, ⁴basa ema kesi tiha ona nia dala barak ho korente no kadeiadu, maibe nia halo kotu korente no halo aat kadeiadu sira. La iha ema nebe maka'as atu tahan nia. ⁵Kalan loron, iha rate no mos iha foho leten, nia hakilar hodi hakanek nia an ho fatuk. ⁶Wainhira nia hare Jesus housi dook, nia halai hasouru Nia hodi monu ain ba Nia, no hakilar ho lia maka'as, "Ita hakarak sa ida housi ha'u, Jesus, Maromak aas liu nia Oan? Hakotu lia ba Maromak katak Ita sei la halo aat ha'u." ⁸Basa Jesus hateten tiha ona ba nia, "Sai housi ema ne'e, espiritu foer!" ⁹Jesus husu, "O nia naran sa?" "Ha'u naran Lubun Boot," nia hatan, "basa ami barak." ¹⁰Nia husu ho laran manas atu la bele duni sai sira housi fatin neba. ¹¹Iha neba iha foho nia sorin, iha fahi barak nebe han dau-daun. ¹²Espiritu foer sira husu Nia: "Haruka ami tama iha fahi sira, husik ami ba sira." ¹³Jesus husik sira, nune'e espiritu foer sai housi ema ne'e hodi tama iha fahi sira. Fahi sira nebe sura besik rihun rua halai housi foho ba tasi laran. Iha neba sira mout hotu.

¹⁴Sira nebe hein fahi halai hodi haktuir buat ne'e hotu iha fatin tomak iha neba. Ema sira mai atu hare buat nebe mosu. ¹⁵Sira hakbesik Jesus hodi hare ema nebe uluk espiritu foer sira hela, tur hela ho hatais. Nia isin no hanoin diak ona; nia nebe uluk iha espiritu foer barak iha nia laran. Sira hotu tauk teb-tebes. ¹⁶Sira nebe hare buat hotu ne'e haktuir kona ba ema ne'e no kona ba fahi sira. ¹⁷Tan ne'e, ema sira hahu husu Jesus atu husik ona fatin neba. ¹⁸Wainhira Nia atu sa'e ona ro ida, ema nebe uluk iha espiritu foer husu Jesus atu husik nia la'o hamutuk ho Nia. ¹⁹Jesus la husik maibe dehan ba nia, "O ba ona uma, ba o nia familia, hodi haktuir ba sira buat hotu nebe Na'i, iha Nia laran luak halo ona ba o." ²⁰Nune'e ema ne'e la'o ba hodi haklaken iha rai Dekapoli tomak buat hotu nebe Jesus halo ba Nia. Ema hot-hotu hakfodak.

Jairo nia oan fetu

²¹Wainhira Jesus hakur fali iha ro laran ba tasi nia sorin balun, ema lubun boot hakbesik hale'u Nia. Nia hamriik iha tasi ibun. ²²Na'i ulun sinagoga nian ida, naran Jairo, to'o mai. Hare tiha Jesus, nia monu ain ²³hodi husu nune'e, "Ha'u oan fetu besik atu mate. Ita hiit an mai, tau liman ba nia atu soi nia. Nune'e nia bele moris." ²⁴Jesus la'o hamutuk ho nia. Ema lubun boot tuir Nia. Ema ida-ida buka atu hakbesik Nia.

²⁵Iha neba iha fetu ida nebe, ba tinan sanulu resin rua ona mak lakon ran. ²⁶Nia terus teb-tebes iha doutor barak sira liman hodi halakon nia rikusoi tomak, maibe la hetan diak ida; hetok nia sai aat liu tan. ²⁷Nia rona kona ba Jesus. Nia mai housi kotuk iha ema lubun boot sira leet hodi kona Jesus nia hena. ²⁸Nia dehan ba nia an rasik, "Ha'u kona deit karik Nia hena, Ha'u sei hetan isin diak," ²⁹Iha oras ne'e kedas, ran la suli tan. Nia isin lolon tomak hetan diak. ³⁰Jesus hatene kedas katak kbiit ruma sai housi Nia. Nia fila oin ba ema lubun boot hodi husu, "Ema se mak kona Ha'u nia hena?" ³¹Eskolante sira dehan ba Nia, "Ema lubun

boot habit dau-daun Ita. Ita sei husu, “Se mak kona Ha’u nia hena?”³² Maibe Nia hateke hale’u nafatin atu hare ema nebe halo buat ne’e.³³ Feto ne’e hakat ba oin, nakdedar no tauk, tan nia hatene buat nebe mosu ba nia. Nia hakneak iha Nia oin hodi dehan sai lialos hotu.²⁴ “Ha’u oan feto,” Jesus dehan, “o nia fiar mak soi o. La’o ba iha dame laran. O hetan diak housi o nia moras ba!”

³⁵ Jesus sei koalia hela wainhira ema sira housi na’i ulun sinagoga nian nia uma mosu mai hodi dehan, “Na’i, ita boot nia oan feto mate ona. Tansa ita boot halo Mestre kole tan?”³⁶ Maibe, rona tiha liafuan hirak ne’e, Jesus dehan ba sinagoga nia na’i ulun, “O keta tauk. Fiar deit ba.”³⁷ Nia la husik ema ida tuir nia. Nia lori deit Pedro, Tiago no Joao, Tiago nia alin.³⁸ Sira to’o tiha na’i ulun sinagoga nian nia uma, Jesus hetan ema barak book an maka’as; balun tanis, balun hakilar.³⁹ Nia tama hodi dehan ba sira, “Tansa imi book an maka’as hodi tanis? Labarik feto ne’e la mate; nia toba deit!”⁴⁰ Sira hasara Nia. Nia haruka sira sai hotu. Nia lori labarik nia aman no inan, ho tan sira nebe mai hamutuk ho Nia ba fatin nebe labarik hela.⁴¹ Nia kaer labarik nia liman hodi dehan ba nia, “Talitha, kumi!” katak “Labarik feto, hamriik ba.”⁴² Labarik feto ne’e hamriik kedas hodi hahu la’o mai la’o ba, basa nia iha tinan sanulu resin rua ona. Ema hotu hakfodak.⁴³ Jesus lia tun ba sira hodi bandu atu ema la bele hatene buat ne’e. Hafoin Nia haruka sira atu fo han ba nia.

6

Ema hewai Jesus iha Nazare

¹ Sai tiha housi fatin ne’e, Jesus fila fali ba Nia rai. Nia eskolante sira la’o hamutuk ho Nia.² Too tiha loron Sabadu, Nia tama iha sinagoga atu hanorin. Ema sira nebe rona Nia koalia hakfodak hodi dehan ba malu, “Nia simu buat hirak ne’e hotu housi los nebe? Oin sa mak Nia bele halo milagre bo-boot hirak ne’e?”³ Nia la’os badaen ai nian, Maria nia oan; Tiago, Jose, Judas no Simao nia maun alin? Nia feton sira la horik iha ita leet?⁴ Sira sai bilan kona ba nia.⁵ Jesus lia tun ba sira dehan, “Iha deit nia rai, iha deit nia uma no parenti sira leet mak profeta ida la hetan naran boot.” Tan ne’e, nia la bele halo milagre iha neba; Nia fo isin diak ba ema moras balun deit hodi tau liman ba sira.⁶ Nia hakfodak tamba sira fiar laek liu. Nune’e Nia la’o tiha ba knua sira nebe besik hodi hanorin iha neba.

Sira sanulu resin rua

⁷ Nia bolu sira sanulu resin rua hodi haruka sira na’in rua rua no haraik mos ba sira kbiit atu ukun espiritu foer sira.⁸ Nia haruka sira lori deit iha dalan ai-tonka ida; la bele lori bukai eh kohe, ka doit iha futukabun.⁹ Sira bele usa sandalis maibe la bele lori hatais tahan rua.¹⁰ Nia dehan ba sira, “Tama tiha iha uma ida, imi sei horik iha neba to’o imi fila.¹¹ Fatin ruma la rona eh la simu imi karik, sai tiha housi neba hodi liki rai rahun housi imi nia ain nudar sasin hasouru sira.”¹² Sira sai ba dau-daun hodi hanorin atu hakribi sala.¹³ Sira duni sai diabu barak no kose mina ba ema moras barak hodi halo sira hetan isin diak.

Liurai Herodes

¹⁴ Liurai Herodes rona kona ba Jesus, basa iha tempu ne’e Nia naran boot ona teb-tebes.¹⁵ Nia dehan katak Joao Baptista moris hi’as housi mate, tan ne’e Nia iha kbiit atu halo milagre sira. Ema dehan, “Nia Elias,” ema seluk dehan, “Nia profeta ida hanesan profeta sira uluk nian.”¹⁶ Maibe, wainhira Herodes rona sira ne’e, nia dehan, “Nia mak Joao Baptista duni. Ha’u tesi tiha nia ulun Nia moris hi’as housi mate.”

Herodes haruka Joao nia ulun

¹⁷ Herodes rasik haruka atu kaer Joao Baptista, hodi hatama nia iha dadur laran tamba Herodiade, Herodes nia alin Filipe nia kaben nebe nia hola fali.¹⁸ Basa Joao lia tun ba Herodes dehan, “Tuir ukunfuan, o la bele hola fali o nia alin kaben!”¹⁹ Herodiade hirus nia teb-tebes hodi hakarak oho nia, maibe nia la bele,²⁰ basa Herodes tauk Joao, nebe nia hatene nudar ema diak no santu ida. Herodes tau matan ba nia; Wainhira nia rona nia koalia, nia laran taridu barak, maibe nia haksolok atu rona nia.

²¹ Tempu diak ida mosu mai wainhira Herodes halo tinan. Nia halo festa boot ida ba soldadu sira nia na’i ulun sira no mos ba ema boot sira rai Galileia nian.²² Wainhira Herodiade nia oan feto mai dansa, nia fo ksolok boot ba Herodes ho nia maluk sira. Tan ne’e, liurai dehan ba feto ne’e, “Husu buat naran deit nebe o hakarak, Ha’u sei fo ba o.”²³ Nia dehan tan hodi jura, “Ha’u sei fo buat naran deit nebe o sei husu, maski ha’u nia reinu nia sorin balun ida.”²⁴ Feto ne’e sai hodi husu nia inan, “Ha’u sei husu sa los?” Nia hatan, “Joao Baptista nia ulun.”²⁵ Feto ne’e halai kedas ba liurai hodi tateten, “Ha’u hakarak katak ita boot fo mai ha’u ohin kedas Joao Baptista nia ulun iha bandeja ida.”²⁶ Liurai laran susar teb-tebes maibe tamba hanoin liafuan nebe nia hakotu tiha ona no mos tamba nia maluk sira, nia lakohi la halo tuir nia liafuan.²⁷ Nune’e, liurai haruka kedas soldadu ida atu lori Joao nia ulun. Ema ne’e la’o ba hodi tesi Joao nia ulun iha dadur laran.²⁸ Tuir mai, nia lori fali ulun ne’e iha bandeja ida nia laran hodi fo nia ba feto. Feto ne’e fo fali nia ba nia inan.

²⁹ Wainhira Joao nia eskolante sira rona kona ba buat hirak ne’e, sira mai hodi lori nia isin mate atu hakoi.

Milagre uluk paun ninian

³⁰ Apostolu sira fila mai no tur hale’u Jesus, hodi haktuir ba Nia buat hotu nebe sira halo no hanorin.³¹ Nia lia tun ba sira dehan, “Imi mai, ita la’o mesak ba fatin fuik ida atu tur halimar uitoan.” Ne’e tamba ema nebe la’o mai la’o ba barak tebes. Sira la biban atu han.³² Tan ne’e, sira sa’e ro hodi hadook an ba fatin fuik ida.³³ Ema hare sira dada an, no ema barak hatene kedas. Nune’e, housi knua sira hotu, ema barak halai housi rai, no to’o uluk liu sira iha fatin neba.³⁴ Wainhira Jesus tun housi ro, Nia hetan ema lubun boot ida. Nia hanoin ema sira ne’e teb-tebes, basa sira hanesan bibi nebe bibi atan la iha. Nia hahu hanorin sira buat barak.

³⁵ Wainhira kalan besik ona, Nia eskolante sira hakbesik Nia hodi dehan, “Fatin ne’e fuik, no mos kalan besik ona.”³⁶ Ne’e duni, haruka sira ba atu sira bele la’o ba uma sira nebe besik hodi sosa buat ruma atu han.”³⁷ Nia hatan, “Imi rasik fo han sira.” Sira simu, “Ami atu sosa paun osan atus rua nia folin ba sira ne’e?”³⁸ Nia husu sira, “Imi iha paun fuan hira? Ba, hare ba!” Sira ba, no wainhira hatene ona, sira dehan, “Iha paun fuan lima no ikan rua.”³⁹ Tuir mai, Nia haruka sira atu halo ema sira tur hamutuk iha grupu iha du’ut modok nia leten.⁴⁰ Sira tur, ema atus ida atus ida eh lima nulu lima nulu.⁴¹ Tuir mai, Nia kaer paun fuan lima no fo ba Nia eskolante sira atu fahe ba ema sira. Nune’e mos Nia fo ikan ba sira.⁴² Ema hot-hotu han to’o bosu.⁴³ Sira halibur hamutuk paun no ikan nia resin, luhu sanulu resin rua nakonu.⁴⁴ Sira nebe han besik rihun lima.

Jesus la’o iha be leten

⁴⁵ Ne’e hotu tiha, Nia haruka Nia eskolante sira atu sa’e ro hodi ba uluk Betsaida. Nia rasik haruka ema lubun boot ne’e ba ona uma.⁴⁶ Sira ba tiha ona, Nia sa’e ba foho tutun atu resa.⁴⁷ Wainhira kalan ona, ro dook ona iha tasi laran, Nia mesak hela iha rai.⁴⁸ Nia hare katak sira kbiit la to’o atu hean, basa anin hu’u hasouru sira. Besik rai hun mutin, Nia hakbesik sira hodi la’o iha be leten. Nia halo sira hanoin katak Nia atu liu deit,⁴⁹ maibe wainhira sira hare Nia la’o iha be leten, sira hanoin katak Nia mate klamar ida.⁵⁰ Sira hakilar maka’as, basa sira hotu hare Nia. Sira hotu tauk teb-tebes. Maibe Nia koalia kedas ba sira dehan, “Aten

berani ba. Ha'u mak ne'e, keta tauk!"⁵¹ Tuir mai, Nia tama ba ro laran. Anin hakmatek ona.⁵² Sira bilan deit, basa sira la komprende milagre paun nian katak sa. Sira nia hanoin sei nakukun hela.

Jesus fo isin diak ba moras sira

⁵³Wainhira sira hakur tiha ona ba tasi nia sorin balun, Jesus ho Nia eskolante sira la'o ba Genesare. Sira kesi ro iha neba.⁵⁴ Wainhira sira tun tiha housi ro, ema barak hatene kedas sira.⁵⁵ Sira halai ba knua nebe besi-besik hodi lori fali ema moras sira iha sira nia tobafatin ka biti, ba fatin nebe sira rona katak Jesus horik hela.⁵⁶ Wainhira Nia tama iha knua eh sidade ruma, ka la'o iha dalan, sira tau ema moras sira iha fatin luan ida hodi husu Nia atu husik sira kona Nia hatais nia ninin. Sira hotu nebe kona nia hetan isin diak.

7

Bei-ala sira nia hanorin

¹Loron ida, eskriba no fariseu balun mai housi Jerusalem, hale'u Jesus.² Sira hare katak Nia eskolante sira han ho liman foer, katak seidaok fase liman.³ Ema fariseu no Judeu sira hotu la han wainhira sira seidaok fase di-diak sira nia lima, tuir lisan bei-ala sira nian.⁴ Sira fila housi merkadu, sira la tur atu han wainhira sira la dauk fase an tuir sira nia lisan. Sira moris tuir lisan selu-seluk tan hanesan fase kopu, fase buli, solur sana riti.⁵ Tan ne'e fariseu no eskriba sira husu, "Tan sa O nia eskolante sira la tuir bei-ala sira nia lisan, maibe sira han ho liman foer?"⁶ Nia lia tun ba sira, "Imi mesa laran makerek! Profeta Isaias koalia lo-los duni kona ba imi wainhira nia hakerek dehan, 'Povu ida ne'e hanoin Ha'u ho deit ibun tutun, maibe nia laran dook los housi Ha'u.' Sira hahi Ha'u leet deit, maibe buat nebe sira hanorin mesa ema nian."⁸ Husik tiha Maromak nia ukunfuan, imi tuir fali ema nia lisan, hodi fase kopu, fase buli no buat barak seluk tan hanesan ne'e."

⁹Nia dehan tan ba sira, "Imi hatene bobar Maromak nia ukunfuan atu halo tuir imi nia lisan sira,¹⁰ Moises rasik dehan, 'Hamtauk o nia aman no inan' no 'Ema nebe hateten aat nia aman ka nia inan sei mate.'¹¹ Imi fali dehan, 'Ema ruma dehan ba nia aman ka nia inan karik: Buat nebe imi bele simu housi Ha'u mak korban, (katak, fo tiha ona ba Maromak)' imi la husik ona nia atu halo buat ruma atu tulun nia aman ka inan,¹³ nune'e imi halo Maromak nia ukunfuan folin laek atu hametin fali imi nia lisan nebe imi fo sai ba imi nia oan sira."

Buat nebe halo ema sai foer

¹⁴Jesus bolu fali povu hodi dehan, "Imi hotu rona hodi komprende ba!"¹⁵ La iha buat ida iha liur nebe tama hodi halo foer ema nia laran, maibe buat nebe sai housi nia laran rasik mak halo foer ema.¹⁶ Ema nebe iha tilun atu rona, rona ba!"

¹⁷Wainhira Nia husik ema lubun ne'e no tama ona iha uma laran, nia eskolante sira husu nia kona ba aiknanoik ne'e.¹⁸ Nia hatan ba sira, imi mos la komprende? Imi la hare katak buat naran deit nebe tama iha ema nia laran housi liur la bele halo nia foer.¹⁹ Basa la tama iha nia fuan maibe iha nia kabun deit hodi sai ba liur." Nune'e nia hatudu katak aihan hotu la foer.²⁰ Nia simu tan, buat nebe mai housi ema nia laran mak halo nia sai foer,²¹ basa housi ema nia laran mak mosu mai hakarak aat nebe lori nia atu halo aat, atu na'ok, atu oho, halo sala foer,²² atu sai karaktern no halo buat aat sira hanesan lohi ema, hahalok foer, laran moras, lia bosok, loko an no hahalok beik.²³ Buat sira ne'e hotu mai housi laran no halo foer ema."

Feto ida nia fiar

²⁴Hafoin Jesus sai housi neba, la'o ba rai Tiro no Sidon. Nia tama iha uma ida, basa Nia lakohi katak ema ruma hatene.²⁵ Feto ida rona kona ba Nia. Nia oan fetu iha diabu iha nia laran. Feto ne'e hakbesik nouku tur ba Nia.²⁶ Nia ema gentiu nebe horik iha rai Siro Fenisia. Nia husu Jesus atu duni sai diabu ne'e housi nia oan fetu.²⁷ Jesus dehan ba nia, "Husik uma-kain nia oan sira han di-diak lai. Hasai aihan housi labarik sira no fo fali ba asu sira, ne'e la diak."²⁸ Feto ne'e hatan, "Los duni, Na'i, maibe asu sira mos iha meja okos han buat nebe familia sira soe tiha."²⁹ Jesus dehan ba fetu ne'e, "Tan o nia lia fuan sira ne'e, ba uma ona. Diabu sai tiha ona housi o nia oan."³⁰ Wainhira fetu ne'e to'o uma, nia hetan nia oan fetu toba hela iha tobafatin. Diabu la iha ona.

Jesus halo ema monok koalia

³¹Tuir mai, Jesus sai housi rai Tiro, hodi la'o housi rai Sidon ba tasi Galileia, liu to'o baliza Dekapoli nian.³² Sira lori ba nia ema tilun diuk no monok, hodi husu Nia atu tau liman ba nia.³³ Hadook tiha ema ne'e housi ema lubun boot, Jesus hatama Nia limanfuan iha nia tilun, tafui hodi kona nia nanal,³⁴ hafoin Nia hateke ba lalehan, dada iis hodi dehan ba nia, "Efeta," katak "Loke ba."³⁵ Ema ne'e nia tilun nakloke kedas, no buat nebe halo nia ibun tos sai tiha. Nia hahu koalia mo-mos.³⁶ Jesus bandu sira atu la bele fo hatene buat ne'e ba ema ruma, maibe liu Nia bandu sira, hetok sira fo hatene liu tan.³⁷ Sira hahi Nia liu tan hodi dehan, "Nia halo tilun diuk sira mos rona monok sira koalia."

8

Jesus fo han ema rihun hat

¹Iha tempu neba, ema lubun boot ida halibur an. Sira aihan la iha. Tan ne'e, Jesus bolu Nia eskolante sira hodi dehan ba sira,² "Ha'u hanoin ema sira ne'e. Sira hela ona ho Ha'u loron tolu no sira aihan la iha."³ Ha'u haruka sira ba uma karik, sira sei monu iha dalan. Balun mai housi dook."⁴ Eskolante sira simu: "Ita bele hetan aihan ba sira ne'e hotu housi los nebe iha fatin fuik ne'e?"⁵ Nia husu ba sira, "Imi iha paun fuan hira?" "Hitu," sira hatan.⁶ Tuir mai Nia haruka sira atu tur iha rai. Nia kaer paun fuan hitu ne'e fo agrades, silu hodi fo ba eskolante sira atu fahe. Sira fahe duni ba ema sira hotu.⁷ Iha mos ikan kiik balun. Nia fo bensa ba sira ne'e, no haruka atu fahe ba ema sira.⁸ Sira han to'o bosu. Sira halibur hamutuk paun rahun resin luhu hitu nakonu.⁹ Ema sira ne'e besik rihun hat.¹⁰ Nia haruka sira ba uma. Tuir mai, Nia sa'e kedas ro ida ho Nia eskolante sira hodi la'o ba rai Dalmanutha.

Fariseu sira husu sinal ida

¹¹Fariseu sira hakbesik Jesus hodi hahu haksesuk malu ho Nia. Sira husu sinal ida housi lalehan atu koko Nia.¹² Ho laran susar, Nia dehan, "Tan sa ema sira otas ne'e nian husu sinal ida? Tebes Ha'u dehan imi katak sei la fo sinal ida ba ema sira otas ne'e nian."¹³ Nia husik sira, hodi sa'e ro atu hakur ba tasi nia sorin balun.

Fariseu no Herodes nia fermentu

¹⁴ Eskolante sira haluha lori paun. Sira iha paun fuan ida deit iha ro laran. ¹⁵ Jesus hateten ba sira, “Matan moris neon na'in ba kona ba fariseu no Herodes sira nia fermentu.” ¹⁶ Sira haksasuk malu hodi dehan, “Nia dehan ne'e tamba paun la iha.” ¹⁷ Wainhira Jesus hatene sira nia hanoin, Nia dehan ba sira, “Tan sa imi hanoin katak Ha'u hateten ne'e tamba paun la iha? Imi seidauk hare no komprende? Imi nia fuan sei la hatene?” ¹⁸ Imi matan iha maibe la hare? Tilun iha maibe la rona? Imi la hanoin hetan? ¹⁹ “Wainhira Ha'u fahe paun fuan lima ba ema rihun lima, imi halibur paun rahun luhu hira?” Sira hatan, “Sanulu resin rua.” ²⁰ Wainhira Ha'u fahe paun fuan hitu ba ema rihun haat, imi halibur fali paun rahun luhu hira?” Sira hatan, “Hitu.” ²¹ Nia dehan teni ba sira, “Imi seidauk komprende?”

Jesus halo ema matan delek hare

²² Sira to'o rai Betsaida. Ema lori ba Nia ema matan delek ida. Sira husu Nia atu tau liman ba nia. ²³ Nia kaer ema matan delek ne'e nia liman hodi lori nia ba knua nia liur. Nia tafui ba ema ne'e nia matan hodi tau liman ba nia. Nia husu, “O bele hare buat ruma?” ²⁴ Ema ne'e nebe hahu hare, hatan, “Ha'u hare ema sira nudar ai-hun nebe la'o ba la'o mai.” ²⁵ Tuir mai Nia tau fali Nia liman ba ema nia matan. Nia hare di-diak ona. Nia bele hare mo-mos buat hotu. ²⁶ Nia haruka ema ne'e ba uma hodi dehan, “Keta tama iha knua nia laran, keta fo hatene ba ema ruma.”

Pedro nia lia sasin

²⁷ Jesus no Nia eskolante sira la'o ba knua sira Sesareia Filipe nian. Tuir dalan Jesus husu ba Nia eskolante sira, “Ema sira dehan katak Ha'u se los?” ²⁸ Sira hatan, “Joao Baptista; balun Elias, seluk fali ema duina ida.” ²⁹ Hafoin Nia husu ba sira, “Imi dehan Ha'u se los?” Pedro hatan ba Nia, “Ita boot mak Messias.” ³⁰ Jesus bandu sira atu la bele hateten sai ba ema ida kona ba Nia.

Jesus koalia kona ba Nia terus no mate

³¹ Tuir mai, Jesus hahu hanorin sira katak Oan Mane sei terus barak. Katuas sira no am'lulik boot sira ho eskriba sira sei hakribi Nia, sei oho Nia, maibe liu lora tolu Nia sei moris hi'as. ³² Nia fo hatene sai mo-mos ida ne'e kedas ba sira. Pedro hadook Nia uitoan housi sira nia maluk hodi haksi'ak Nia. ³³ Maibe Nia fila ba kotuk, hateke ba Nia eskolante sira no haksi'ak Pedro dehan, “Hadook an tiha housi Ha'u, Satanas, basa o la buka Maromak nia hakarak maibe o buka deit ema nia hakarak.” ³⁴ Hafoin Jesus bolu fali ema lubun boot ho Nia eskolante sira hodi dehan ba sira, “Ema nebe hakarak tuir Ha'u, nia sei hakribi nia an rasik, simu nia krus hodi la'o tuir Ha'u.” ³⁵ Basa, ema nebe hakarak soi nia moris sei lakon nia; maibe ema nebe lakon nia moris tamba Ha'u no tan liafuan diak sei soi nia. ³⁶ Ema manan sa los wainhira nia manan munda tomak maibe halo aat nia klamar? ³⁷ Eh ema sei troka sa los ba nia klamar? ³⁸ Basa ema nebe moe kona ba Ha'u no Ha'u nia liafuan iha otas maksalak no foer ne'e nian, Oan Mane mos sei moe kona ba nia wainhira Nia mosu mai iha Nia Aman nia kmanek ho Nia anju santu sira.”

9

¹ Nia dehan ba sira, “Tebes Ha'u dehan ba imi katak ema ida housi sira nebe iha ne'e sei la mate molok nia hare Maromak nia reinu mosu mai ho kbiit tomak.”

Jesus nakfila An

² Liu tiha lora ne'e, Jesus lori Pedro, Tiago no Joao mesa-mesak ba foho aas ida. Nia nakfila An iha sira nia oin. ³ Nia hena sira sai nabilan, mutin teb-tebes hanesan neve; ema ida iha rai ne'e la bele halo mutin liu tan. ⁴ Hafoin Moises no Elias mosu ba sira hodi koalia ba Jesus. ⁵ Pedro hahu koalia, dehan ba Jesus, “Mestre, diak liu ita horik ona iha ne'e! Ami halo takabaluk tolu; ida ba Ita, ida ba Moises no ida ba Elias.” ⁶ Basa nia la hatene atu dehan sa los, tan sira tauk teb-tebes. ⁷ Kalohan ida tun mai, taka sira. Housi kalohan ne'e sira rona lia ida dehan, “Ida ne'e mak Ha'u Oan doben. Imi rona Nia ba!” ⁸ Teki-teki, sira hare ba sorin sorin maibe la hare tan ema ida; Jesus mesak deit iha neba hamutuk ho sira. ⁹ Tun dau-daun housi foho, Jesus dehan sira atu keta haktuir ba ema ida buat nebe sira hare, molok Oan Mane moris hi'as housi mate. ¹⁰ Ne'e duni, sira nonok hodi husu ba sira an rasik moris hi'as housi mate ne'e katak sa. ¹¹ Sira husu ba Nia dehan, “Tan sa eskriba sira dehan katak Elias sei mai uluk knanain?” ¹² “Tebes duni,” Nia hatan ba sira, “Elias sei mai uluk atu hadia buat hotu, no oin sa Eskritura hateten kona ba Oan Mane katak Nia sei terus maka'as hodi ema hewai Nia ho laran aat?” ¹³ Maibe Ha'u dehan ba imi katak Elias mai tiha ona, no ema sira trata nia nudar sira hakarak, lo-los nudar Eskritura haktuir ba Nia.”

Jesus fo isin diak ba labarik ida nebe iha espiritu foer

¹⁴ Wainhira Nia ba hamutuk fali ho eskolante sira seluk, Nia hare ema lubun boot hale'u sira, hamutuk ho eskriba balun nebe haksasuk malu ho sira. ¹⁵ Wainhira sira hare Jesus, ema hotu hakfodak tebes hodi halai hasouru Nia no kumprimenta Nia. ¹⁶ Nia husu, “Imi haksasuk malu kona ba se los?” ¹⁷ Ema ida housi lubun ne'e hatan ba Nia, “Mestre, ha'u lori ha'u nia oan ne'e mai Ita. Nia iha espiritu aat iha laran. ¹⁸ Wainhira espiritu aat ne'e kaer nia, nia soe nia ba rai. Kaben sai housi nia ibun. Nia ruun nehan no nia isin tos. Ha'u husu Ita nia eskolante sira atu duni sai nia maibe sira la bele.” ¹⁹ “Imi ema fiar laek!” Nia hatan. “To'o wainhira mak Ha'u sei horik ho imi? To'o wainhira los mak Ha'u sei tahan imi? Lori nia mai!” ²⁰ Sira lori labarik ba Nia. Wainhira espiritu aat hare Jesus, nia doko maka'as labarik ne'e to'o nia monu ba rai. Nia kaben nakfurin iha nia ibun. ²¹ “Houri wainhira mak buat ne'e mosu ba nia?” Jesus husu ba nia aman. “Houri kiik kedas,” aman hatan. ²² “Dala barak espiritu aat ne'e soe nia ba ahi no ba be nia laran atu halo aat nia. Ita bele halo buat ruma karik, hanoin ami no tulun ami.” ²³ “Ita bele karik?” Jesus husu. “Buat hotu bele deit ba ema nebe fiar!” ²⁴ Labarik nia aman dehan kedas, “Ha'u fiar duni; tulun ha'u nia fiar kiik ne'e.” ²⁵ Wainhira Jesus hare ema barak nebe hakbesik Nia, Nia si'ak spiritu aat. “Espiritu tilun diuk no monok, Ha'u haruka o, sai housi nia no keta fila fali tan!” Nia dehan. ²⁶ Doko fali labarik ne'e, spiritu aat sai housi nia hodi hakilar maka'as. Labarik monu ba rai hanesan ema mate ida. Nune'e ema barak dehan, “Nia mate ona.” ²⁷ Maibe Jesus kaer nia liman no halo nia hamriik, to'o nia bele hamriik mesa-mesak.

²⁸ Wainhira Nia tama ona iha uma laran, eskolante sira husu Nia, “Tan sa ami la bele duni sai nia?” ²⁹ Jesus hatan ba sira, “Buat sira hanesan ne'e bele duni sai deit hodi hamulak no hadera an.”

Jesus koalia fali kona ba Nia mate

³⁰ Nia ho nia eskolante sira hakat liu ba Galileia nia sorin. Nia lakohi katak ema hatene ne'e. ³¹ Tuir mai, Nia hanorin Nia eskolante sira hodi dehan, “Ema sei saran Oan Mane ba ema sira liman, no ema sira ne'e sei oho Nia. Maibe mate tiha, liu tiha lora tolu, Nia sei moris hi'as fali.” ³² Sira la komprende lia hirak ne'e katak sa, maibe sira tauk atu husu Nia.

Se mak boot liu

³³Too tiha Kafarnaum, Jesus tama iha uma laran no husu Nia eskolante sira, “Imi haksasuk malu kona sa los iha dalan?” ³⁴Sira nonok deit basa sira haksasuk malu kona ba sira ida nebe mak boot liu. ³⁵Hafoin Jesus tur tiha, bolu sira na’in sanulu resin rua hodi dehan ba sira, “Ema se mak hakarak sai boot liu sira seluk nian, nia sei sai ikus liu hotu hodi sai ema hotu nia atan.” ³⁶Tuir mai, kaer tiha labarik oan ida hodi tau nia iha sira nia klaran no hakoak nia, Nia dehan, ³⁷“Ema nebe simu labarik oan ida ne’e hodi Ha’u nia naran, nia simu Ha’u rasik; no ema nebe simu Ha’u, la simu Ha’u maibe simu ida nebe haruka Ha’u mai.”

Ema nebe la funu hasouru Nia

³⁸Joao hasa’e lia ba Nia, “Mestre, ami hare ema ida nebe duni sai diabu hodi Ita nia naran. Nia la la’o ho ita, tan ne’e ami bandu tiha nia.” ³⁹Maibe Jesus hatan, “Imi keta halo nune’e, basa ema ida la bele halo milagre hodi Ha’u nia naran hafoin hateten aat kedas Ha’u. ⁴⁰Ema nebe la halo aat hasouru ita, nia ita nian. ⁴¹Ema nebe fo be kopu ida ba imi tan imi Kristu nian, Ha’u hateten kedas ba imi, ema ne’e sei la lakon nia kolen.”

Ema nebe dada labarik ba sala

⁴²“Ema ruma dada karik ba aat labarik oan ida nebe fiar Ha’u, diak liu tara fatuk hadulas batat nian ba ema ne’e nia kakorok, hafoin soe nia ba tasi laran. ⁴³O nia liman dada karik o ba sala, tesi tiha nia; hetan moris ho liman ida deit diak liu fali tama iha infernu ho liman rua tomak. ⁴⁴Iha neba ular sira sei la mate, ahi mos la mate. ⁴⁵O nia ain lori karik o ba sala, tesi tiha nia. Tama ba moris rohan laek ho ain ida deit diak liu fali tama iha infernu ho ain rua. ⁴⁶Iha neba ular sira la mate, ahi mos la mate. ⁴⁷O nia matan ida dada karik o ba sala, losu tiha nia. Tama iha Maromak nia reinu ho matan ida deit diak liu fali tama iha infernu ho matan rua. ⁴⁸Iha neba ular sira la mate, ahi mos la mate. ⁴⁹Ema hotu sei hamer an ho ahi. ⁵⁰Masin diak, maibe wainhira masin lakon nia mer, oin sa mak o bele halo nia mer fali? Imi iha masin iha imi nia an ba, hodi moris ho dame ho imi nia maluk sira.”

10

Jesus hanorin kona ba haketak malu

¹Housi neba, Nia la’o ba rai Judeia hodi hakur ba Jordao nia sorin balun. Dala ida tan ema lubun boot hakbesik Nia. Tuir Nia lisan, Nia hanorin sira. ²Tuir mai, fariseu balun mai atu koko Nia hodi husu: “Mane ida bele soe nia kaben ka lae?” ³Maibe Nia hatan ba sira, “Moises fo ukun sa los?” ⁴Sira hatan, “Moises husik katak kaben na’in ida hakerek surat haketak malu nian hodi soe malu.” ⁵Jesus dehan, “Nia hakerek ukunfuan ne’e ba imi basa imi fuan tos. ⁶Houri uluk kedas, Maromak halo sira mane ho feto; ⁷tan ne’e, mane ida husik nia aman no inan sira hodi ba hamutuk ho nia kaben. Sira Na’i rua sai isin ida deit. ⁸Ne’e duni, sira la’os tan ema na’in rua, maibe isin ida deit. ⁹Tan ne’e, buat nebe Maromak tau hamutuk ona, ema ida haketak fali.” ¹⁰Wainhira sira to’o ona uma, eskolante sira husu fali kona buat ida ne’e. ¹¹Nia dehan ba sira, “Mane ida nebe soe nia kaben no hola feto seluk halo adulteriu hasouru nia; ¹²no mos feto ida nebe soe nia laen hodi hola fali mane seluk halo adulteriu.”

Jesus fo bensa ba labarik sira

¹³Ema lori labarik sira ba atu Nia tau liman sira. Maibe eskolante sira haksi’ak sira nebe lori labarik sira ne’e. ¹⁴Wainhira Nia hare sira, Nia hirus hodi dehan ba sira, “Husik labarik sira hakbesik Ha’u; keta hadook sira. Lo-los, reinu lalehan mak ba sira nebe hanesan sira ne’e. ¹⁵Tebes Ha’u dehan ba imi: Ema nebe la simu Maromak Nia reinu hanesan labarik oan sira ne’e, nia sei la tama iha neba.” ¹⁶Hafoin, Nia hakoak labarik sira, tau liman ba sira hodi fo bensa ba sira.

Foinsa’e ida nebe riku

¹⁷Wainhira Nia atu la’o ona, ema ida halai hasouru Nia,uku tur ba rai hodi husu Nia, “Mestre diak, Ha’u sei halo sa atu bele hetan moris rohan laek?” ¹⁸Jesus hatan ba nia, “Tan sa o dehan katak Ha’u diak? Maromak deit mak diak. ¹⁹O hatene Maromak nia ukunfuan sira hotu: keta halo adulteriu, keta oho, keta na’ok, keta foti lia bosok hasouru ema, keta lohi ema, hamtauk ho nia aman no inan.” ²⁰Nia hatan hodi dehan ba Nia, “Mestre, Ha’u moris tuir sira ne’e hotu houri kiik kedas.” ²¹Jesus fihir nia di-diak, hadomi nia hodi dehan ba nia, “Buat ida deit mak o sei kuran: fila ba uma, fa’an o nia sasan tomak, fahe ba ema kiak sira no o sei hetan rahun diak iha lalehan. Halo tiha ne’e, mai tuir Ha’u.” ²²Rona tiha liafuan hirak ne’e, nia neon sala tebes; nia fila ba uma ho neon nakraik, basa nia iha rikuso barak. ²³Jesus hateke ba sira nebe hale’u Nia hodi dehan ba Nia eskolante sira, “Susar tebes duni ba ema riku ida atu tama iha Maromak nia reinu.” ²⁴Eskolante sira hakfodak ho lia fuan sira ne’e. Maibe Jesus dehan tan ba sira, “Oan doben sira, tama iha Maromak nia reinu susar tebes duni ba sira nebe tau sira nia laran ba rikuso sira. ²⁵Kuda kamelu ida atu tama iha daum nia kuak lalais liu fali ema riku ida atu tama iha Maromak nia reinu.” ²⁶Sira hakfodak liu tan hodi hateten ba malu, “Nune’e karik, ema se mak bele hetan maksoin?” ²⁷Jesus hateke ba sira hodi dehan, “Ba ema la bele, maibe la’os ba Maromak, basa ba Maromak buat hotu bele deit.” ²⁸Pedro simu dehan ba Nia, “Ami husik buat hotu hodi tuir Ita.” ²⁹Jesus hatan dehan, “Tebes Ha’u dehan ba imi; la iha ema nebe husik uma, feto naan, maun alin, inan, aman oan ka to’os tamba liafuan diak, ³⁰nebe sei la simu uma, maun alin, inan, oan no to’os sira dala atus ida liu fali uluk nian iha tempu ne’e hamutuk ho susar oi-oin, no iha tempu nebe atu mai, moris rohan laek. ³¹Maibe, ema barak nebe mai uluk sei sai ikus, sira nebe mai ikus sei sai uluk.”

Jesus koalia kona ba Nia mate ba dala tolu

³²Sira sa’e dau-daun ba Jerusalem. Jesus la’o iha sira oin. Sira bilan deit. Sira nebe tuir Nia tauk. Dala ida tan, haketak tiha ema sanulu resin rua housi sira seluk, Nia hahu hateten ba sira buat nebe sei mosu ba Nia. ³³Ohin ita sa’e ba Jerusalem, ema sei saran Oan Mane ba am’lulik boot no eskriba no katuas sira. Sira sei tesi lia ba Nia hodi haruka ema atu oho Nia. Sira sei saran Nia ba ema gentiu sira, ³⁴nebe sei hasara Nia no tafui ba Nia no baku Nia no oho Nia; liu loron tolu Nia sei moris hi’as.”

Tiago no Joao husu buat ida

³⁵Tiago no Joao, Zebedeu nia oan sira, hakbesik Nia dehan, “Mestre, ami hakarak katak Ita halo buat nebe ami husu.” ³⁶Nia dehan ba sira, “Imi hakarak katak Ha’u halo sa los ba imi?” ³⁷Sira hatan, “Halo ami tur, ida iha Ita nia sorin kuana, ida iha Ita nia sorin karuk, iha Ita nia kmanek.” ³⁸“Imi la hatene buat nebe imi husu,” Jesus dehan ba sira. “Imi bele hemu kopu nebe Ha’u sei hemu, eh simu baptisnu nebe Ha’u sei simu?” ³⁹Sira hatan, “Ami bele.” Jesus dehan ba sira, “Kopu nebe Ha’u sei simu, imi sei simu duni; no baptisnu nebe Ha’u sei simu imi sei simu duni; ⁴⁰maibe kona ba tur iha Ha’u nia sorin kuana eh sorin karuk, buat ne’e la iha Ha’u nia kbiit atu fo ba imi, maibe rai hela ba sira nebe Maromak hadia tiha ona.”

⁴¹Wainhira sira na’in sanulu seluk rona ne’e, sira hirus Tiago no Joao, ⁴²maibe Jesus bolu sira hotu hodi dehan, “Imi hatene katak iha gentiu sira leet, Na’i ulun sira ukun ho liman todan hodi halo sira nia emar sira halo tuir duni. ⁴³Maibe iha imi leet, la’os hanesan ne’e. Ema se hakarak sai boot, nia sei sai ema nia

atan; ⁴⁴ no ida nebe hakarak sai uluk liu iha imi leet, nia sei sai imi nia atan; ⁴⁵ basa Oan Mane rasik la mai atu ema serbi Nia, maibe atu serbi ema, no atu saran Nia moris atu soi ema hotu.”

Jesus halo Bartimeu hare fali

⁴⁶ Sira ba to'o Jeriko. Wainhira Nia atu sai ona housi neba ho Nia eskolante sira ho ema lubun boot, ema matan delek ida, Bartimeu, Timeo nia oan, tur iha dalan ninin, husu esmola. ⁴⁷ Wainhira nia rona katak Jesus Nazare liu housi neba, nia hahu hakilar hodi dehan, “Jesus, David nia Oan, sadia ha'u!” ⁴⁸ Ema barak si'ak nia hodi haruka nia atu nonok, maibe nia hakilar maka'as liu tan, “David nia Oan, sadia ha'u!” ⁴⁹ Jesus hamriik hodi haruka atu lori nia mai. Ne'e duni sira bolu ema matan delek ne'e. “Aten berani,” sira dehan, “Hamriik ba. Nia bolu o.” ⁵⁰ Nia soe nia lipa, hamriik kedas hodi la'o lalais ba Jesus. ⁵¹ Jesus lia tun ba nia dehan, “O hakarak Ha'u sei halo sa los ba o?” “Mestre,” ema matan delek ne'e hatan, “Halo Ha'u hare!” ⁵² Jesus lia tun, dehan, “Ba, o nia fiar soi o!” Nia matan nakloke kedas no nia la'o hamutuk ho Jesus iha dalan.

11

Jesus tama iha Jerusalem

¹ La'o besik dau-daun ba Jerusalem no Betania, iha foho Oliveira nian, Jesus haruka Nia eskolante na'in rua atu ba uluk ² hodi dehan ba sira, “Imi la'o ba knua nebe hela iha imi nia oin. Imi tama ba, imi sei hare keda burru oan ida kesi hela, ema seidaok sa'e. Imi kore tiha nia, lori mai. ³ Ema dehan karik ba imi, ‘Tan sa imi halo nune'e?’ imi sei hatan, ‘Na'i hakarak nia, maibe la kleur, Nia sei haruka lori fali mai iha ne'e.’”

Sira ba. Sira hetan kuda oan ida kesi hela iha odamatan iha liur besik luron. Sira kore tiha nia. ⁵ Ema balun nebe hela iha neba husu ba sira, “Tan sai imi kore kuda burru oan ne'e?” ⁶ Sira hatan tuir Jesus hanorin. Ema husik sira la'o ba. ⁷ Sira lori kuda burru oan ba Jesus, tau sira nia hena iha leten. Jesus sa'e ba nia. ⁸ Ema barak nahe sira nia hena iha dalan; sira seluk nabe ai-sanak matak nebe sira tesi iha to'os. ⁹ Sira nebe la'o iha oin no sira nebe la'o iha kotuk haklalak dehan, “Osana! Diak tebes ida nebe mai hodi Na'i nia naran!” ¹⁰ Diak tebes aman David nia reinu nebe to'o mai dau-daun. Osana leten aas ba!”

¹¹ To'o tiha Jerusalem, Nia tama iha templu. Nia hare buat hot-hotu iha neba, maibe tamba kalan besik ona, Nia ba Betania ho nia eskolante sanulu resin rua.

Jesus hateten aat ai figueira ida

¹² Loran nebe tuir mai, wainhira sira husik Betania, Nia hamlaha, ¹³ Sira hare housi dook ai figueira ida ho tahan barak. Nia hakbesik atu hare Nia bele hetan fuan ruma ka lae. To'o tiha neba, Nia hetan tahan deit, basa tempu atu ai figueira fo fuan seidaok to'o duni. ¹⁴ Nia dehan, “Ema sei la han tan o nia fuan tinan ba tinan.” Nia eskolante sira rona buat sira ne'e hotu.

Jesus tama iha templu

¹⁵ To'o tiha Jerusalem, Nia tama iha Templu no hahu duni sai sira hotu nebe sosa no fa'an iha templu. Nia hatun meja sira ema nebe troka osan no fa'an manu falur nian. ¹⁶ Nia la husik ema lori sasan sira liu housi Templu laran. ¹⁷ Tuir mai, Nia hahu hanorin hodi dehan ba sira, “La hakerek ona, ‘Ema sei bolu Ha'u nia uma orasaun povu hot-hotu nian?’ Imi fali halo nia nakfila ba na'okten sira nia luhan!” ¹⁸ Am'lulik boot no eskriba sira rona kona ba buat ne'e no sira buka oin sa sira bele oho Nia, basa sira tauk Nia tamba povu tomak hakfodak kona ba Nia hanorin.

¹⁹ Kalan tiha ona wainhira Jesus husik sidade.

Ai figueira namlaek

²⁰ Iha dader, wainhira sira liu housi neba, sira hare ai figueira namlaek ona to'o abut. ²¹ Pedro hanoin hetan hodi dehan ba Nia, “Mestre, hare ba; ai figueira nebe Ita fo malisan namlaek ona.” ²² Jesus hatan ba nia dehan, “Fiar Maromak ba! Tebes Ha'u dehan ba imi: lo-los, ema nebe hateten ba foho ne'e, ‘Fokit o nia an housi ne'e no soe o nia an ba tasi laran,’ hodi la namlele iha nia fuan maibe fiar katak buat nebe nia dehan sei mosu, sei mosu duni ba nia. ²⁴ Ne'e duni, Ha'u dehan ba imi katak buat nebe imi husu hodi resa, fiar ba katak imi sei simu; nia sei mosu duni ba imi. ²⁵ Wainhira imi hamriik atu resa, fo perdu ba sira nebe imi hirus atu imi nia Aman iha lalehan sei fo perdu ba imi. ²⁶ Imi la fo perdu karik, imi nia Aman nebe iha lalehan mos sei la fo perdu ba imi.”

Ema husu kona ba Nia kbiit

²⁷ Sira fila fali ba Jerusalem. Wainhira Jesus la'o dau-daun iha templu, am'lulik boot sira no eskriba no katuas sira ba hasouru Nia. ²⁸ Sira dehan ba Nia, “Ho kbiit ida nebe mak o halo buat ne'e? Eh, ema se mak fo kbiit ba O atu halo buat hirak ne'e hotu?” ²⁹ Jesus hatan, “Ha'u husu buat ida deit ba imi. Imi bele hatan mai Ha'u karik, Ha'u mos sei hateten ba imi kona ba Ha'u nia kbiit atu halo buat ne'e hotu. ³⁰ Joao nia baptizmu mai housi lalehan ka housi ema? Hatan mai Ha'u ba!” ³¹ Sira haksasuk malu hodi dehan, “Ita dehan housi lalehan; Nia sei hateten ‘Tan sa imi lakohi fiar nia?’” ³² Maibe ita hateten karik, ‘Housi ema,’ – sira tauk povu basa ema hotu fiar katak Joao ne'e profeta lo-los. ³³ Ne'e duni sira hatan ba Jesus, “Ami la hatene.” Jesus dehan ba sira, “Ha'u mos sei la hateten ba imi kona ba Ha'u nia kbiit atu halo buat hirak ne'e hotu.”

12

Aiknanoik kona ba to'os uvas nia na'in

¹ Nia koalia ba sira ho aiknanoik sira. “Ema ida halo to'os uvas nian, hale'u nia ho lutu, ke'e kuak no harii torre ida. Tuir mai, nia saran to'os ne'e ba ema kontratu na'in. Nia la'o ba rai seluk. ² Wainhira tempu los to'o ona, nia haruka nia emar ida atu husu buat nebe monu ba nia. ³ Maibe sira kaer emar ne'e, baku nia no haruka nia fila ho liman mamuk. ⁴ Dala ida tan, nia haruka ema seluk ba sira. Nia mos sira baku no trata aat. ⁵ Nia haruka tan ema seluk, maibe sira oho nia. Nune'e mos ema barak seluk; balun sira baku, balun sira oho. ⁶ Ikus mai, nia iha ema ida deit atu haruka: nia oan mane mesak nebe nia hadomi. Nia haruka ba sira hodi hanoin, ‘Sira sei hamtauk Ha'u nia oan.’ Maibe ema kontratu na'in sira dehan ba malu, ‘Ida ne'e mak nia liman rohan na'in! Mai, ita oho nia, nune'e nia liman rohan sei monu mai ita.’ ⁸ Sira kaer no oho nia, hafoin soe nia ba liur. ⁹ To'os na'in ne'e sei halo sa los? Nia sei mai no halo lakon ema kontratu na'in sira ne'e hodi saran to'os uvas nian ba ema seluk. ¹⁰ Imi seidaok lee lia hakerek ne'e: ‘Fatuk nebe badaen sira hewai nakfila ba fatuk inan; ¹¹ buat ida ne'e Na'i mak halo. Nia sai buat kmanek liu iha ita nia oin?’” ¹² Sira buka atu kaer Nia, basa sira hatene katak Nia koalia kona ba sira ho aiknanoik ida ne'e, maibe sira tauk povu. Sira ba hodi husik Nia.

Kona ba impostu

¹³ Tuir mai, sira haruka fariseu balun no Herodes nia emar sira atu halo Niaibun sala. ¹⁴ Sira ne'e mosu mai hodi dehan ba Nia, "Mestre, ami hatene katak Ita la tauk ema ida, basa Ita la fihir ema nia oin, maibe hanorin deit dalan Na'i ninian ho lia los. Bele selu impostu ba Cesar ka lae? Ami sei selu ka lae?" ¹⁵ Nia hare sira nia laran makerek. Nia hatan ba sira dehan, "Tan sa imi koko Ha'u? Lori osan mai Ha'u atu Ha'u bele hare!" ¹⁶ Sira fo osan ba Nia. Nia husu ba sira, "Ida ne'e nia ilas no hakerek, se nian?" "Cesar nian," sira hatan. ¹⁷ Jesus dehan fali, "Fo fali ba Cesar buat nebe Cesar nian; no ba Maromak buat nebe Maromak nian!" Sira hakfodak ho hatan ida ne'e.

Moris hi'as housi mate

¹⁸ Tuir mai, Saduseu balun nebe fiar katak la iha moris hi'as hakbesik Jesus hodi husu Nia, ^{19c} Mestre, Moises hakerek katak wainhira mane ida nia maun mate hodi husik nia kaben no sira na'in rua oan la iha, mane ne'e sei hola fetofaluk ne'e atu fo oan ba nia maun. ²⁰ Iha maun alin na'in hitu. Ida boot liu hola fetofaluk nia mate, la hetan oan ida. ²¹ Ida nebe tuir nia hola fetofaluk ne'e, maibe nia mos mate, la hetan oan. Nune'e mos ho ida nebe tuir nia. ²² Sira na'in hitu hola fetofaluk ne'e, no la hetan oan ida. Ikus mai fetofaluk ne'e mate. ²³ Iha moris hi'as, wainhira sira hotu sei moris fali, fetofaluk ne'e se los nia kaben, basa sira hotu hola nia?" ²⁴ Jesus hatan ba sira, "Imi hanoin sala teb-tebes! Imi la komprende Eskritura sira no Maromak nia kbiit. ²⁵ Basa wainhira sira sei moris hi'as housi mate, mane ho fetofaluk hola malu tan. Sira sei sai hanesan anju sira iha lalehan. ²⁶ Kona ba mate sira sei moris hi'as fali, imi la lee Moises nia livru, iha fatin nebe koalialia kona ba ai-hun nebe lakan, katak Maromak koalialia ba nia dehan, 'Ha'u Abraao nia Maromak, Isaac nia Maromak, no Jacob nia Maromak.' ²⁷ Nia la'os ema mate nia Maromak maibe ema moris nian. Imi hanoin sala teb-tebes!"

Ukunfuan boot liu hotu

²⁸ Eskriba ida, nebe rona Nia koalialia no hare oin sa Jesus hatan diak los ba sira, mai hasouru Nia hodi husu, "Ukunfuan uluk liu hotu ida nebe los?" ²⁹ Jesus hatan, "Ida nebe uluk liu mak: 'Rona ba, Israel. Na'i, ita nia Maromak, mak Na'i ida mesak. ³⁰ O sei hadomi Na'i o nia Maromak ho o nia fuan tomak, ho o nia neon tomak no ho nia kbiit tomak.' ³¹ Ida nebe tuir nia mak ne'e: 'O sei hadomi o nia maluk sira nudar o nia an rasik.' La iha tan ukunfuan nebe boot liu sira ne'e." ³² Eskriba ne'e dehan ba Nia, "Ita koalialia lo-los, Mestre. Buat nebe ita hateten fo-foun ne'e los duni, katak Maromak ida mesak; la iha tan ida seluk. ³³ Hadomi Nia ho o nia fuan tomak, ho o hanoin no kbiit tomak, no hadomi o nia maluk hanesan o nia an rasik; ida ne'e mak boot liu buat karan eh sakrifisiu hotu." ³⁴ Jesus hare katak nia koalialia ho matenek. Nia dehan ba eskriba ne'e, "O la dook housi Maromak nia reinu!" La iha tan ema nebe berani atu husu lia ba Nia.

Lia kona ba Messias

³⁵ Tuir mai, wainhira nia hanorin iha templu, Jesus dehan, "Oin sa eskriba sira balun dehan katak Messias ne'e David nia Oan?" ³⁶ Basa David rasik, ho Espiritu Santu nia naroman dehan, 'Na'i hateten ba Ha'u nia Na'i: Tur iha Ha'u nia sorin kuana to'o tempu nebe Ha'u tau O nia funubalun sira iha o nia ain nia okos.' ³⁷ David rasik bolu Nia Na'i; ne'e duni, oin sa mak Nia nia oan fali?" Ema barak rona Nia ho ksolok.

Jesus halo sira matan moris kona ba eskriba sira

³⁸ Nia dehan hodi hanorin, "Matan moris ba kona ba eskriba sira, nebe hakarak la'o ho unuk nar-naruk atu ema kumprimenta sira iha merkadu, ³⁹ atu tur iha sinagoga sira nia oin eh iha ema boot sira nia fatin iha festa. ⁴⁰ Sira ne'e mak ema nebe tolan fetofaluk sira nia rikusoimaski sira halo ema hare ho laran makerek katak sira resa barak. Sira ne'e sei hetan susar boot liu."

Fetofaluk nia osan

⁴¹ Nia tur iha osan fatin nia oin, hodi hare ema sira nebe tau osan iha neba. Ema riku sira tau osan barak. ⁴² Fetofaluk kiak ida mos mosu hodi tau osan fuan kiik rua. Osan ne'e nia folin kiik tebes. ⁴³ Jesus bolu nia eskolante sira hodi dehan ba sira, "Tebes Ha'u dehan ba imi; fetofaluk ne'e tau barak liu fali sira seluk nebe tau osan iha osan fatin, ⁴⁴ basa sira tau osan nebe resin ba sira, maibe housi uitoan nebe nia iha, nia tau hotu, buat nebe nia kuran atu moris."

13

Jesus koalialia kona ba Jerusalem

¹ Wainhira sira husik dau-daun Templu, eskolante ida dehan ba Nia, "Mestre, hare ba fatuk bo-boot sira ne'e! Hare ba andar aas sira ne'e!" ² Jesus hatan, "Imi hare andar bo-boot sira ne'e? Fatuk ida mos sei la hela iha fatuk seluk nia leten. Buat hotu ne'e sei sobu tiha."

Susar boot atu mai

³ Jesus tur iha foho oliveira nian hodi fila oin ba Templu. Pedro, Tiago no Joao husu Nia, ^{4c} Dehan took mai ami wainhira buat hotu ne'e sei mosu no mos sinal sira nebe sei hatudu katak buat hotu ne'e sei halo tuir duni." ⁵ Nune'e Jesus hahu hateten ba sira, "Matan moris ba atu ema la bele lohi imi! ⁶ Ema barak sei mai hodi usa Ha'u nia naran, dehan, 'Ha'u mak Nia,' no sira sei lohi duni ema barak. ⁷ Wainhira imi rona kona ba funu no lia bosok kona ba funu, imi keta tauk. Buat hirak ne'e sei mosu duni, maibe rohan seidauk to'o mai. ⁸ Nasaun sei ba hasouru nasaun seluk, no reinu hasouru reinu seluk. Iha fatin balun, rai sei nakdoko; iha fatin seluk tan sei hamlaha boot, maibe terus oi-oin sei hahu deit ho ida ne'e."

^{9c} Matan moris ba! Ema sira sei saran imi ba tribunal, sira sei baku imi iha sinagoga; imi sei hamriik iha na'iulun no liurai sira nia oin tan Ha'u nia naran atu fo sasin ba sira kona ba Ha'u, ¹⁰ basa, uluk knanain, liafuan foun diak sei haklaken ba nasaun hotu. ¹¹ Wainhira sira lori imi atu sasin ba ema, imi keta hanoin resin atu dehan sa los. Koalialia deit buat nebe sei fo sai ba imi iha tempu neba, basa la'os imi mak sei koalialia, maibe Espiritu Santu. ¹² Maun sei saran nia alin; aman sei saran nia oan; oan sira sei ba hasouru sira nia aman inan hodi oho sira. ¹³ Ema hotu sei hirus imi tan Ha'u nia naran; maibe ema nebe sei tahan to'o rohan sei hetan Maksoin."

Ida nebe ema hakribi

¹⁴ Wainhira imi hare katak ida nebe ema hakribi hamriik iha fatin nebe la'os ninian, (ema nebe lee, buka komprende ba), sira nebe iha Judeia halai ba foho ba; ¹⁵ ema ruma karik iha uma leten, nia keta tun ba uma laran atu hasai buat ruma iha neba; ¹⁶ ema ruma iha to'os karik, nia keta fila fali atu hola nia unuk. ¹⁷ Susar boot ba sira nebe isin rua eh ho oan nurak, wainhira loron sira ne'e sei mai. ¹⁸ Resa ba, atu buat sira ne'e la mai iha tempu rai malirin nian, ¹⁹ basa iha loron sira ne'e susar boot sei mosu; seidauk hetan susar ida hanesan nia houri tempu nebe Maromak hakiak mundu ne'e to'o ohin. ²⁰ Na'i la habadak karik loron sira ne'e, ema ida la bele tahan. Maibe Na'i sei habadak nia duni tamba sira nebe Nia fihir ona. ²¹ Ema ruma dehan karik ba imi, 'Hare ba, Kristu mak ne'e ona' eh 'Hare ba,

Nia iha neba, imi keta fiar, ²² basa messias bosok sira sei mosu mai hodi lori sinal no buat oi-oin atu, bele karik, lohi mos sira nebe Maromak fihir ona. ²³ Ne'e duni, matan moris ba! Buat hotu ne'e Ha'u fo hatene nanis ona."

Oan Mane hiit An mai

²⁴ Maibe iha loron sira ne'e, susar boot sira ne'e hotu tiha, loron sei sai nakukun, fulan sei lakon nia naroman, ²⁵ fitun sira sei monu housi lalehan, no kbiit lalehan nian sei nakdoko hela. ²⁶ Tuir mai, sira sei hare housi kalohan sira Oan Mane hiit An mai ho kbiit no kmanek wa'in. ²⁷ Nia sei haruka anju sira atu halibur hamutuk sira nebe Nia fihir ona, housi lorosa'e no loromonu, tasi fetu no tasi mane, housi rai ikun no rai ulun, to'o lalehan nia rohan."

Hanorin ida housi ai figueira

²⁸ hare ba ai figueira hanesan ilas ida. Wainhira nia sanak sai maran no dikin sira mosu, imi hatene katak bainloron to'o ona. ²⁹ Nune'e mos, wainhira imi hare buat hirak ne'e mosu, hatene ba katak tempu to'o ona, besik ona iha odamatan. ³⁰ Tebes, Ha'u dehan ba imi, molok otas ne'e liu tiha, buat hotu ne'e mosu tiha ona. ³¹ Lalehan ho rai sei liu tiha, maibe Ha'u nia liafuan sei la lakon."

Ema ida la hatene loron eh oras

³² Kona ba loron eh oras, ema ida la hatene; anju sira mos iha lalehan no Oan Mane rasik la hatene. Aman deit mak hatene. ³³ Loke matan ba! Matan moris ba, hodi resa, basa imi la hatene wainhira tempu ne'e sei to'o mai. ³⁴ Buat ne'e, nudar ema la'o rai nebe husik nia uma hodi haraik kbiit ba atan sira, fahe knaar ba sira ida-ida no haruka ida nebe hein odamatan atu sai matan moris neon na'in. ³⁵ Ne'e duni, matan moris neon na'in ba, basa imi la hatene wainhira uma na'in sei mai: iha loraik, iha kalan fahe rua, iha rai hun mutin ka iha dader; ³⁶ atu wainhira nia teki-teki mai, nia la hetan imi dukur hela. ³⁷ Buat nebe Ha'u dehan ba imi, Ha'u dehan ba ema hotu: matan moris ba!"

14

Am'lulik boot buka atu oho Jesus

¹ Sei hela loron rua tan molok festa Paskua no Paun Azimo nian. Am'lulik boot sira no eskriba sira buka namanas atu lohi hodi kaer Jesus atu oho Nia. ² Sira dehan, "Iha festa laran la bele, keta povu halo funu hasouru ita."

Jesus iha Betania

³ Jesus hela iha Betania, iha Simao nebe moras lepra nia uma. Nia tur hela iha meja, fetu ida lori mai botil alabastru ida nakonu ho mina morin nardu nian, nebe folin boot tebes. Nia fera botil ne'e hodi fui mina morin ba Jesus nia ulun. ⁴ Ema balun hirus hodi dehan ba malu, "Tan sa halo aat leet mina morin ne'e? ⁵ Ita bele fa'an nia ba folin denariu atus tolu resin hodi fo ba ema kiak." Sira hateten aat fetu ne'e. ⁶ Maibe Jesus dehan, "Husik nia ba! Tan sa imi halo terus nia? Nia halo buat diak ida mai Ha'u. ⁷ Kiak sira imi sei hetan nafatin; wainhira imi hakarak, imi bele halo diak ba sira. Maibe Ha'u, imi sei hetan bei-beik. ⁸ Nia halo buat nebe nia bele. Nia tau nanis mina morin ba Ha'u isin atu hadia nia ba rate. ⁹ Ha'u dehan los ba imi: iha mundu tomak, iha fatin naran deit nebe ema sei haklaken liafoun diak, sira sei haktuir buat nebe nia halo ne'e atu hanoin nia."

Judas hakotu lia atu saran Jesus

¹⁰ Sira sanulu resin rua ne'e ida, naran Judas Iscariotes, ba koaliala ho am'lulik boot sira atu saran Jesus ba sira. ¹¹ Rona tiha nia, sira haksolok hodi hakotu lia atu fo osan ba nia. Nia buka namanas tempu diak ida atu saran Nia.

Jesus halo han hemu Paskua nian ho Nia eskolante sira

¹² Iha loron uluk Paun fermentu laek nian, wainhira sira hasa'e buat karan Paskua nian, eskolante sira husu ba Jesus, "Ita hakarak katak ami hadia han hemu Paskua nian iha nebe los?" ¹³ Jesus haruka eskolante Na'i rua hodi dehan ba sira, "Imi ba sidade laran. Mane ida nebe lori be iha buli ida sei la'o hasouru imi. Imi tuir nia, no iha fatin nebe nia tama, imi husu ba uma na'in: ¹⁴ Mestre husu: fatin nebe Ha'u atu halo han hemu Paskua nian hamutuk ho Ha'u nia eskolante sira iha los nebe?" ¹⁵ Nia sei hatudu fatin luan ida iha andar leten nebe nahe no halo furak ona. Imi hadia sasan sira iha neba." ¹⁶ Eskolante sira ba sidade. Sira hetan buat hotu nudar Nia dehan ba sira. Sira hadia sasan hotu ba han hemu Paskua nian. ¹⁷ Wainhira kalan ona, Nia mai ho sira sanulu resin rua. ¹⁸ Wainhira sira tur iha meja no han dau-daun, Jesus dehan, "Ha'u fo hatene sai ba imi: imi sira ne'e ida sei saran Ha'u; ida nebe han hamutuk ho Ha'u." ¹⁹ Sira hahu neon kraik. Ida-ida husu ba Nia, "Ha'u karik?" ²⁰ Jesus hatan ba sira, "Imi na'in sanulu resin rua ne'e, nia mak ida nebe tau liman hamutuk ho Ha'u iha bikan. ²¹ Oan Mane sei mate duni, nudar hakerek ona kona ba Nia, maibe susar ba ema nebe saran Oan Mane ne'e. Ema ne'e lalika moris karik diak liu."

Han hemu Paskua nian

²² Sira han dau-daun, Jesus kaer paun, fo bensa hodi silu no fo ba Nia eskolante sira dehan, "Imi simu ba. Ne'e Ha'u nia isin." ²³ Tuir mai, Nia foti kalis, fo agradeses no fo ba sira. Sira hotu hemu. ²⁴ Jesus dehan ba sira, "Ne'e Ha'u nia ran, ran aliansa nian, nebe sei nakfakar tamba ema lubun boot. ²⁵ Ha'u dehan los ba imi: Ha'u sei la hemu tan housi uvass fuan to'o loron nebe Ha'u sei hemu tua foun iha Maromak nia reinu."

Jesus fo hatene nanis katak Pedro sei heli lia

²⁶ Hananu tiha knananuk hahi nian ida, sira sa'e ba foho Oliveira nian. ²⁷ Jesus lia tun ba sira, "Imi hotu sei monu, basa hakerek nanis, 'Ha'u sei hakanek bibi atan; bibi sira sei namkari.' ²⁸ Maibe, moris hi'as tiha housi mate, Ha'u sei ba uluk imi iha Galileia." ²⁹ Pedro hatan ba Nia, "Maski hot-hotu sei monu, Ha'u lae!" ³⁰ Jesus lia tun ba nia, "Ha'u dehan los ba o: iha kalan ne'e rasik, molok manu kokorek dala rua, o sei heli lia kona ba Ha'u dala tolu." ³¹ Maibe Pedro dehan teni maka'as liu tan, "Maski Ha'u mate ho Ita, Ha'u sei la heli lia!" Eskolante sira seluk mos hateten hanesan ne'e.

Jesus resa iha Getsemane

³² Sira to'o tiha to'os ida naran Getsemane, Jesus lia tun ba eskolante sira, "Imi hela iha ne'e. Ha'u sei ba atu harohan." ³³ Nia lori Pedro, Tiago no Joao hamutuk ho Nia. Nia hahu laran taridu, laran tauk. ³⁴ Nia dehan ba sira, "Ha'u laran susar to'o mate. Imi hela iha ne'e hodi matan moris neon na'in ba." ³⁵ Hakat uitoan ba oin, Nia monu ba rai hodi harohan atu, bele karik, hadook tiha oras ne'e housi Nia. Nia dehan, ³⁶ Abba, Aman, buat hotu bele deit ba Ita. Hadook tiha housi Ha'u kalis ida ne'e; maibe keta halo tuir buat nebe Ha'u hakarak, maibe buat nebe Ita hakarak." ³⁷ Tuir mai, Nia fila hodi hetan sira toba hela. Nia lia tun ba Pedro, "O toba, Simao? O la bele hein oras ida deit?" ³⁸ Nia dehan ba sira, "Imi matan moris neon na'in ba hodi harohan atu imi la bele monu ba tentasaun. Espiritu

hakarak tebes, maibe isin kbiit laek.”³⁹ Nia hadook an fali atu harohan hodi dehan nafatin liafuan sira uluk nian.⁴⁰ Nia fila fali hodi hetan sira toba hela, basa sira matan dukur tebes. Sira la hatene hatan buat ida ba Nia.⁴¹ Wainhira Nia fila ba dala tolu, Jesus dehan ba sira, “Ohin ne’e imi toba ona hodi hakmatek. Tempu to’o ona. Hare ba, Oan Mane ne’e ema atu saran ona ba ema maksalak sira nia liman.”⁴² Hamriik ba, ita la’o ona. Ema nebe sei saran Ha’u mai besik ona.”

Ema kaer Jesus

⁴³Iha oras ne’e duni. Jesus sei koaliala hela, Judas, sira na’in sanulu resin rua ne’e ida, mosu ho ema lubun boot nebe lori surik no ai-dona. Am’lulik boot sira, eskriba sira no katuas sira mak haruka sira mai.⁴⁴ Ida nebe atu saran Nia fo sinal ida ba sira dehan, “Ida nebe Ha’u rei, Nia mak ne’e. Imi kaer Nia, lori Nia met-metin!”⁴⁵ Nia to’o neba, nia hakbesik kedas Jesus hodi dehan ba Nia, “Mestre!” Nia rei Jesus.⁴⁶ Sira tau liman ba Nia hodi kaer Nia.⁴⁷ Sira nebe iha neba ida losu nia surik, hakanek am’lulik boot nia atan hodi tesi nia tilun.⁴⁸ Jesus dehan ba sira, “Imi mai ho surik no ai-dona atu kaer Ha’u, hanesan fali hasouru na’okten ida?”⁴⁹ Loron loron Ha’u hela ho imi iha templu hodi hanorin, imi la kaer Ha’u, maibe ne’e atu halo tui Eskritura.”⁵⁰ Ne’e hotu tiha eskolante sira halai hotu no husik Nia mesak.⁵¹ Mane klosan ida tui Nia, taka deit ho lipa ida. Sira atu kaer nia.⁵² Nia husik tiha lipa no halai isin tanan.

Jesus iha Sinedriu

⁵³Sira lori Jesus ba am’lulik boot, no am’lulik boot sira hotu, katuas no eskriba sira halibur an hamutuk.⁵⁴ Pedro tui Nia housi dook to’o am’lulik boot nia uma. Nia tur hamutuk ho guarda sira hodi haneruk ahi.⁵⁵ Am’lulik boot sira no Sinedriu tomak buka namanas sasin ida hasouru Jesus atu sira bele saran Nia ba mate, maibe, sira la hetan.⁵⁶ Ema barak foti lia bosok hasouru Nia maibe sira nia lia sasin la tui malu.⁵⁷ Balun kesar Nia ho sasin bosok ida ne’e;⁵⁸ Ami rona Nia dehan ‘Ha’u sei sobu Templu ne’e nebe ema mak halo, hafoin iha loron tolu nia laran, Ha’u sei harii fali ida seluk nebe la’os ema mak halo.”⁵⁹ Maibe maski nune’e, sira nia lia sasin la tui malu.⁶⁰ Ne’e duni, am’lulik boot hamriik iha sira nia leet hodi husu Jesus, “O la hatan buat ida ba buat hotu nebe sira foti hasouru o?”⁶¹ Maibe Nia nonok deit, la hatan buat ida. Am’lulik boot husu fali Nia dehan, “O Messias, Maromak diak nia Oan?”⁶² Jesus hatan ba nia, “Ha’u duni. Imi sei hare Oan Mane tur iha Maromak kbiit na’in nia kuana, hodi mai ho kalohan lalehan nian.”⁶³ Am’lulik boot hales nia unuk hodi dehan, “Tan sa ita sei presisa ema atu sasin hasouru Nia.”⁶⁴ Imi rona Nia hateten aat Maromak. Imi hanoin sa?” Sira hotu tesi lia katak Nia soi mate.⁶⁵ Hafoin sira balun hahu tafui ba Nia, taka Nia oin ho hena dehan, “Si’ik took!” Guarda baku Nia.

Pedro heli lia kona ba Jesus

⁶⁶Pedro hela iha liur iha uma oin. Am’lulik boot nia atan fetu ida besik nia.⁶⁷ Hare nia haneruk ahi, nia hateke ba nia hodi dehan, “O mos hamutuk ho Jesus Nazare!”⁶⁸ Maibe nia heli lia dehan, “Ha’u la hatene buat nebe o hateten.” Nia sai ba liur no manu ida kokorek.⁶⁹ Tui mai nia hakat ba odamatan. Atan fetu hare fali nia hodi hateten ba sira nebe iha neba, “Ida ne’e sira ida!”⁷⁰ Maibe nia heli lia fali. La kleur ema sira nebe iha neba dehan ba Pedro, “Los duni, o sira nian ida, basa o ema Galileia.”⁷¹ Maibe nia hahu hotar hodi jura, “Ha’u la hatene ema nebe imi dehan dau-daun ne’e!”⁷² Dala ida tan manu kokorek. Pedro hanoin hetan liafuan nebe Jesus dehan nanis ba nia, “Molok manu kokorek dala rua, o sei heli lia kona ba Ha’u dala tolu.” Nia hahu tanis.

15

Jesus iha Pilatos nia oin

¹Sei dadersan hela, am’lulik boot sira halibur katuas sira, eskriba sira no Sinedriu tomak. Sira futu Jesus, lori no saran Nia ba Pilatos.² Pilatos husu ba Nia, “O ema Judeu sira nia liurai?” Nia hatan, “Hanesan o dehan.”³ Am’lulik boot sira kesar buat oi-oin kona ba Nia.⁴ Pilatos husu fali, “O la hatan buat ida? O hare took ba, sira kesar buat oi-oin kona ba O.”⁵ Maibe Jesus la hatan buat ida. Ida ne’e halo Pilatos hakfodak.⁶ Tui lisan festa Paskua nian. Pilatos husik ema dadur ida nebe Judeu sira husu.⁷ Iha ida naran Barrabas, nebe hela iha dadur laran hamutuk no ema sira seluk nebe halo revolusaun. Nia oho ema iha tempu neba.⁸ Ema lubun ne’e husu Pilatos atu fo ba sira ema nebe sira husu tui lisan.⁹ Nia husu sira, “Imi hakarak katak Ha’u husik Judeu sira nia Liurai?”¹⁰ Nia hatene katak am’lulik boot sira saran Nia tamba sira laran moras.¹¹ Maibe am’lulik boot sira haka’as an atu halo ema lubun boot ne’e husu Pilatos atu husik Barrabas.¹² Pilatos hahu koaliala fali hodi husu sira, “Ne’e duni, Ha’u sei halo sa los ba ida nebe imi hanaran Judeu sira nia Liurai?”¹³ Sira hakilar fali, “Hedi Nia ba krus!”¹⁴ Pilatos husu ba sira, “Maibe Nia halo aat sa ida?” Sira hakilar liu tan, “Hedi Nia ba krus!”¹⁵ Tan ne’e, Pilatos husik Barrabas atu fo ksolok ba sira. Nia haruka baku no hedi Jesus iha krus.

Soldadu sira hasara Jesus

¹⁶Soldadu sira lori Nia ba pretoriu laran, hafoin, halibur tiha sira maluk hotu,¹⁷ sira tau ba Nia hena mean ida. Sira leu ai-tarak, tau ba Nia ulun.¹⁸ Tui mai, sira kumprimenta Nia dehan, “Viva, liurai Judeu sira nian!”¹⁹ Sira baku Nia ulun ho fafulu ida, tafui ba Nia, no hakneak iha Nia oin hodi hanai Nia.²⁰ Hasara tiha Nia, sira hasai hena mean, tau fali Nia hatais. Sira lori Nia housi neba atu iha krus.

Sira hedi Jesus iha krus

²¹Sira kaer ema ida naran Simao housi Sirene, Alexandre no Rufo nia aman, nebe fila dau-daun housi to’os, atu lori krus.²² Sira lori Nia ba fatin ida naran Golgotha, katak, fatin ulun ruin nian.²³ Sira hakarak fo tua kahur ho naan horun ba Nia, maibe Nia la hemu.²⁴ Tui mai, sira hedi Nia iha krus. Sira fahe Nia hatais ba malu hodi koko sorte atu hare ida-ida lori ida nebe.²⁵ Sira hedi Nia ba krus iha tuku sia dader.²⁶ Buat nebe sira hakerek atu hatudu tansa Nia hetan kastigu mak: “Liurai Judeu sira nian.”²⁷ Hamutuk no Nia, sira hedi mos ba krus na’okten na’in rua, ida iha sorin kuana, ida seluk iha Nia sorin karuk.²⁸ Nune’e mak halo tui Eskritura nebe dehan, “Ema sura Nia hamutuk ho ema aat sira.”²⁹ Ema sira nebe liu housi neba doko sira nia ulun hodi hateten aat Nia: “O sei sobu Maromak nia Templu, no harii fali nia iha loron tolu nia laran; soi O nia An ba, hodi tun housi krus!”³⁰ Am’lulik boot sira no eskriba sira mos hasara Nia dehan, “Nia soi ema seluk: Nia rasik la bele soi an!”³¹ Messias, liurai Israel nian tun housi krus ba atu ami bele hare hodi fiar!” Sira na’in rua mos nebe hedi iha krus hamutuk ho Nia hasara Nia.³²

³³Iha loron fahe rua, rai tomak sai nakukun, to’o tuku tolu loraik.³⁴ Iha tuku tolu loraik, Jesus hakilar ho lia maka’as, “Eloi, Eloi. lama sabachtani?” katak, “Ha’u nia Maromak, Ha’u Nia Maromak, tansa Ita husik Ha’u?”³⁵ Rona tiha ne’e, sira balun dehan, “Hare ba, Nia bolu Elias!”³⁶ Sira ida halai hodi habokon hena iha tua sin, hafoin tau ba fafulu ida nia rohan, lolo ba Nia atu hemu hodi dehan, “Hein lai, ita hare Elias sei mai atu hatun Nia ka lae!”³⁷ Jesus, hodi hakilar maka’as, iis kotu.³⁸ Hena templu nian nakles housi leten to’o kraik, fahe rua.³⁹ Senturiaun nebe iha krus nia oin, hare Nia iis kotu nune’e dehan, “Tebes, ema ne’e Maromak

nia Oan duni!”⁴⁰ Iha mos fetu balun nebe tui hosi dook. Sira ne'e mak Maria Madalena, Maria, Tiago kiik no Jose nia inan, no Salome.⁴¹ Sira la'o tui Jesus hodi serbi Nia wainhira Nia hela iha Galileia. Iha mos seluk tan nebe sa'e hamutuk ho Nia ba Jerusalem.

Ema hakoi Jesus

⁴²Iha loraik, tamba lora ne'e lora atu hadia sasan nian, katak lora molok Sabadu, ⁴³Jose Arimateia, membru Sinedriu ida ho naran boot, koalia ho Pilatos hodi husu Jesus nia isin mate. Jose ne'e mos hein Maromak nia reinu.⁴⁴ Pilatos hakfodak katak Jesus mate ona. Nia bolu senturiaun ida hodi husu Jesus mate ona duni ka lae.⁴⁵ Wainhira senturiaun fo hatene lo-los. Pilatos fo Jesus nia isin mate ba Jose.⁴⁶ Jose sosa lensol ida. Nia hatun hodi falun Nia ho lensol ne'e, no hakoi Nia iha rate ida nebe ke'e tiha iha fatuk. Nia duir fatuk ida ba rate nia odamatan.⁴⁷ Maria Madalena, no Maria, Jose nia inan, hare katak sira hakoi duni Jesus iha neba.

16

Jesus moris hi'as

¹Lora Sabadu liu tiha, Maria Madalena, Maria Tiago nian, no Salome sosa mina morin atu tau ba Jesus.² Iha lora uluk semana nian, foin dadersan hela, lora foin sa'e, sira la'o ba rate.³ Sira dehan ba malu, “Se mak sei duir fatuk hosi rate nia odamatan?”⁴ Maibe wainhira sira ba hare, sira hetan katak fatuk ne'e duir tiha ona. Fatuk ne'e boot tebes.⁵ Sira tama iha rate lora no hare mane foinsa'e ida ho hatais mutin, tur iha sorin kuana. Sira hakfodak.⁶ Nia dehan ba sira, “Imi keta tauk. Imi buka Jesus Nazare nebe mate iha krus? Nia moris hi'as ona; Nia la iha ne'e. Fatin nebe sira tau Nia iha neba.”⁷ Maibe imi la'o ba, fo hatene ba Nia eskolante sira no ba Pedro katak Nia sei ba uluk liu imi iha Galileia. Iha neba imi sei hare Nia nudar Nia dehan nanis ba imi.”⁸ Sira halai hosi rate, nakdedar no tauk teb-tebes. Sira la dehan ba ema ida tamba sira tauk.

Jesus mosu ba Maria Madalena

⁹Moris hi'as tiha ona iha dader lora uluk semana nian, Jesus mosu uluk knanain ba Maria Madalena, ida hosi nebe Nia duni sai diabu na'in hitu.¹⁰ Tui mai, fetu ne'e ba sira nebe la'o hamutuk ho Nia. Sira ne'e lora nakraik hodi tanis. Nia fo hatene ba sira.¹¹ Sira la fiar wainhira nia dehan katak Jesus moris ona no nia hare Nia.

Jesus mosu ba Nia eskolante sira

¹²Ne'e hotu tiha, Jesus mosu mos ho oin seluk ba ema na'in rua nebe la'o dau-daun ba knua ida.¹³ Sira ne'e fo hatene ba sira seluk, maibe sira la fiar sira ne'e.

Jesus mosu ba eskolante sanulu resin ida

¹⁴Ikus mai, sira sanulu resin ida tur dau-daun iha meja. Nia mosu ba sira hodi si'ak tamba sira fiar laek no ulun fatuk tos, basa sira la fiar sira nebe hare Nia moris hi'as ona.¹⁵ Nia dehan ba sira, “Imi ba mundu tomak, haklaken liafuan diak ba ema hot-hotu.”¹⁶ Ema nebe fiar no simu baptismu sei hetan maksoin; maibe ema nebe la fiar sei hetan kastigu.¹⁷ Sinal sira nebe sei hela ho sira nebe fiar mak ne'e: hodi Ha'u nia naran, sira sei duni sai diabu sira; sira sei koalia lia mesak foun;¹⁸ sira sei kaer samea sira; sira hemu karik buat moruk no lanuk ruma, sira sei la hetan susar ida. Sira sei tau liman ba ema moras, no sira ne'e sei hetan isin diak fali.

Jesus sa'e ba lalehan

¹⁹Ne'e hotu tiha, Na'i Jesus sa'e ba lalehan hodi hatodan An iha Aman Maromak nia kuana.²⁰ Hafoin sira sai hodi haklaken liafuan diak iha fatin hot-hotu. Na'i fo tulun ba sira no hametin sira nia liafuan ho milagre oi-oin.